



寒水齋先生集
十五

墓表
行狀

共十卷

~ 16
2420
15



2420
15-15



寒水齋先生文集卷之三十三

墓表

副護軍李公志淵墓表

韓山之李世稱多賢近代怡愉堂德洙以德行為鄉先生其從父兄之子護軍公亦以長德名鄉黨至今誦慕不衰焉公諱志淵字則聖生於萬曆辛巳俊嶷異凡自兒時喜怒不形文才瞻敏人皆奇之壬辰之亂父忠義公被賊禍時公年纔十二日夜哀號如不欲生水漿不入於口而斂葬盡其節觀者歎其誠與才俱至也忠義公遇害之地即先壠往來之道也



輒引避之終身不由是徑每當忌辰攀號失聲無異
皇皇之日雖僕隸無不感動流涕丙子虜變奉母夫
人避山谷中窮寒露處公親拾楮燠火煖石而安
之雖顛沛流離之際親不知苦平居常侍左右不暫
離側如遇疾病則躬執藥餌衣不解帶家甚貧窶而
甘旨之供未嘗乏絕也孜孜藝業屢舉不中用薦授
齊陵參奉辛巳遭內艱服闋復除靖陵例遷內
資奉事有盡職稱一日公不樂於仕棄而還鄉鄉人
推以爲莘巷院長士風賴以丕振焉公旣老固辭不
居允菴先生代之靜處一室琴書自娛八十蒙優老

恩陞通政付副護軍年至耄耄氣力尚強丁未六
月十五日與羣從杯酒團會翌日示儻正席就枕揮
扇而語子孫曰有生必有死世豈有長生者乎俄然
而逝聞者異之曰眞仙化也享年八十七葬于清州
上黨山下柔土郎負已之原公天稟仁厚操守堅確
居鄉接物恂恂謹敕不怒而人敬畏之公旅宦時鄉
人客死同京邸公解衣服辦棺材親自斂屍其家子
弟感其恩終身父事之公歿加麻以報焉居家循蹈
禮法雖九十之年非有疾病必晨起盥櫛正衣冠而
坐祭祀必盡誠敬教子嚴而有法酒戶甚寬而亦不

至亂公遠祖諱穀稼亭公其後牧隱公稽麟齋公種
學連三代大鳴於世五世祖惟清左議政曾祖諱洎
贈執義祖諱湊考諱德濟忠義妣密陽朴氏判官善
元之女江叟先生薰之孫也娶全州李氏秉節校尉
好文之女有婦德先公七年而卒與公同塋生四男
命稷相稷邦稷後稷皆以文行見推於鄉黨長房二
男秀傑秀英二女蔡萬九柳東明次房六男秀億生
員秀萬秀千秀七秀五秀三二女趙世輔李鏡皆進
士三房庶出三男秀坤秀一武科秀夏五女孫萬千
金敏業朴瑞生員韓晉相李大來四房三男秀觀秀

咸秀恆三女林濟生員吳漢明林柱世內外曾玄多
不盡錄公之曾孫府使文海今將豎表於公墓使其
從弟朝海謁文于余遂略敘如右俾刻于石

主簿鄭公 泌墓表

公諱泌字玉如迎日人松江先生之玄孫也會祖諱
宗溟擢魁科官通政府使 贈兵曹判書祖諱漫生
員 贈吏曹參判考諱慶演縣監 贈吏曹判書有
隱德至行玄石朴公誌其墓妣德水李氏學生稷之
女公以己卯二月十日生閱月母夫人歿育子祖
母朴夫人幼性至孝質慤重厚判書公憐其早失恃

教不程督而自知讀書甫成童淹貫經史時判書公謝官家居奉養朴夫人公於讀書之暇躬自漁獵以繼脩繕之具或出外得異味輒歸以供親厨稍長能代幹家事判書公清修恬淡以經史自娛家事一付之公公經營服勞不使知有無憂常以生不識慈顏為至痛事繼妣閔氏如所生餘力治公車業自以才魯致千百之功而竟落拓不第人稱其屈己卯除慶基殿參奉換授 永昭殿轉陞司饗奉事典牲直長尚衣別提 國法蔭仕準朔者必講試銓部而後許除守軍人或勸公就試公笑曰白首之年隨眾自

術豈非可恥乎竟不就自罷復 除長興庫主簿棄官歸忠州庄舍以病卒於癸未十一月十八日以明年正月某日葬于州西利安里永平洞辛向之原公娶昌原黃氏學生瑜之女舉四男二女龜河龍河驪河龜河龍河俱有文行知名士友間龍河不幸早歿金三淵昌翕惜其文才志行有哀詞女壻士人李馨遠尹志洙龜河娶進士柳畦女生四男隳早歿有一子光先一女適李華鎮柔榮槃龍河娶玄溟翼女無子以柔為子有三男一女俱幼驪河娶朴文麟女生三子棹樾一子幼女適徐尚修驪河娶金澂女

生一子槩李馨遠有一子命翊權知性黃壤其二女
壻一女未字尹志洙有一女適李龍普繼後子曰敬
義公孝於親與兄弟友處鄉黨務於忠信教子弟必
以義方斯可謂善人者耶平生言行可記者多而公
之弟丈巖公浩誌之頗詳丈巖賢者其言可徵於來
世奚待余一二談然公之諸胤以余嘗託契於公甚
厚俾余文其表余不忍辭遂撮其槩略敘述如右銘
曰
有封四尺長者之藏松江之孫丈巖之兄石以表之
故人之銘用示千秋無敢毀傷

參奉宋公奎炯墓表

有孝友篤於家忠信著於鄉少有大志卒無所成而
歿者曰恩津宋公諱奎炯字文伯宋氏以高麗判院
事大原爲上祖入我朝雙清堂愉當太宗朝退
居懷德自是簪組蟬聯遂爲東方大族曾祖松潭公
諱柟壽通川郡守祖諱希進掌令考諱國憲自如道
察訪以長德雋才不見用世皆惜之妣忠州池氏其
考汝海以鐵山府使死義於南漢贈官兵曹參判
公以崇禎己卯十二月廿三日生於清州首谷第
年五十一蔭授濬源殿參奉以察訪公病不就卒

於甲申四月十九日葬于州南斗山先塋下負壬原
去池夫人兆尤近遺意也公豐貌脩幹望之儼然而
內實慈良人皆可親奉老盡誠體無完衣而親極滋
味事繼母如母繼母之弟少公一歲而敬之如舅繼
母弟歎曰待我如此孝於姊氏可知公之四弟二妹
皆閔夫人出也公外氏貲產頗饒析與已著以救其
窮曰均吾同氣何忍獨厚居喪足不及中門之內祭
祀極其誠敬每日晨謁家廟事伯父殿中公一如所
生姊氏寡居三山省謁不怠佳饌必分少時從兄疫
歿救藥治喪公自獨當殿中公甚奇之待人接物曲

盡其情見其非義鑄責嚴截然事過卽忘人無怨者
酷愛佳山水興到必往往必忘歸善飲酒對客盡歡
不問家中有無人或勸之仕則笑而不應配慶州金
氏士人震雄女參議偉之玄孫也在家有孝女稱旣
歸事尊章奉烝嘗咸得其空與諸叔久處一家妯娌
之間一無間言生與公同年歿於癸巳九月二日有
二男相元相鎮三女適趙尚元李謙閔就聖長房所
后男必浚女閔宅洙次房二男必溥必淳三女長閔
鎮永餘幼趙壻六男一女男數敦餘幼李壻閔壻皆
一男三女并幼嗚呼公行懿甚備且有幹局唯其不

求聞於世是以終老田野而無悔斯可奇哉余往來
師門數十年必於公乎宿留知公莫余若也其孤之
託以墓文有以也夫蓋嘗聞同春先生美公之氣貌
而曰必不空老尤菴先生喜公之善居鄉而嘖嘖獎
詡四宰霽月公聞公之訃而哭之慟曰吾門善人亾
矣此足以據而評公而不媿吾筆矣遂撮其略俾刻
于石

處士韓公曄墓表

湖西之禮山縣有鳳頭巖處士韓公曄隱居行義於
其中鄉人稱鄉文學者稱文文數郡皆尊仰之然公

棄世世亦棄公年八十六終於崇禎戊子二月十
二日人莫不嗟惜之公字晦伯生而穎悟四五歲已
能屬文往往吐辭驚人伯父侍直公喜仁大奇之十
四魁漢城試文名大震老成之士無不折輩行願交
性至孝少事二親能色養父病疽吮之乃瘳及喪啜
粥致毀三年如一日兩兄構毒癘親自救護歿則朝
夕撫柩哀慟而終不染聞者驚歎曰今之庾叔褒也
事伯氏如父毫分不敢擅用季弟貧甚戚曰吾有婦
產可自給盡以已財與之觀乎此餘可推矣始居洛
陽東村屢舉不中遂卜築于禮山日與遠近學者教

授講劇由是鄉俗丕變間有才傑雅飭之士彬彬可
觀而有安定湖中之遺風焉平居非甚病必冠服危
坐雖家人未嘗見其箕踞喜觀古今儒賢事實抄爲
冊子斯須不離又戒子孫曰小學一書實做人樣子
汝輩及時勉學吾死無所恨區區科第之榮非所願
也已已禍作歎曰國無母矣士失宗矣人可以此時
出於世乎飭子弟輟舉業丙子除夕忽夜坐喟然仍
呼筆書一絕曰受形天地到稀五叵耐重逢丙子年
腥雨漢城無限痛白頭燈下撫秋蓮蓋寓平生慷慨
悲憤之意也甲申是 大明淪亾之回甲也士林遵

允菴宋先生遺命建祠於華陽洞中名以萬東以祀
神宗 毅宗兩皇上公聞而歎曰吾東人之有辭
於天下萬世者其在斯乎但老且病未得趨觀廟貌
是吾恨也宗家地遠老不能往參祭祀則每喪餘之
日據朱子家禮註說以紙榜將事及其末年使子弟
代奠而自以淡衣幅巾伏哭階下子弟諫之則曰雖
欲伏哭其能幾年乎屬纊前一日以所佩囊付與其
孫曰先妣手蹟在此我死納棺中蓋公佩此已六十
年人莫知之至是發之乃教誨之言也年踰大耋親
舊屬子弟使聞於朝陳乞優老 恩例公笑曰少而

求名老且不止不亦無恥乎終不聽及丁丑朝家有慶覃恩耆老給通政資人曰此則君賜不可違公不得受而盖亦不屑焉上黨之韓肇自勝國太尉諱蘭冠於譜自是代有大官承繼軒裳至領議政諱尚敬我朝開國元勳卽柳巷先生諱脩之子也高祖諱垓曾祖諱汝聖官皆監察祖諱詮僉正有清節不仕光海朝考諱得仁從仕郎妣慶州李氏其父主簿誣也公之配水原崔氏通政漢衢之女閭法稱於鄉里智周不滯丈夫莫及歿先公十一年與公同窆卽鳳頭西麓坐卯之原也舉一男六女男允元女

崔鼎者李世徵崔煒白時協崔元度李錫圭允元二男一女男弘祚弘祐女尹烜庶男弘祺弘祉女白尚志崔鼎者二男徵厚安厚李世徵四男一女男禮禎崔煒二男一女男光岳光周白時協一男尚啓崔元度一女李錫圭一男內外曾孫摠若干余與弘祚善以道義相許與又見徵厚氏亦席上之珍也士友方以遠到期之是皆發端於公孰謂醴泉無源也一日弘祚以狀示余遂隳楛而成文俾刻於墓石庶幾百世之下知其爲高士之藏云

處士吳公國獻墓表

丹城有處士吳公國獻字重賢篤孝人也自幼已知事親之禮晨昏定省出入必告恆侍左右省視供奉疾病焚香祝天請以身代至於叩頭流血又嘗割指進血有神效前後喪居廬啜粥平居語及父母必流涕忘日哀痛如袒括時家廟隔遠病不能參祀則必復奠獻於家以伸其情兄弟三人友愛惻怛鄉隣誦其行新增勝覽及邑誌載之如此少也文才絕異屢舉不成名杜門田里以水石花鳥自樂孜孜於聖賢之書老而不懈人勸之仕則掉頭不應尤菴先生書贈漁隱二字以嘉之又嘗出入於同春之門先生亦

頗稱許以壬子至月十四日終于家壽七十四越明年八月十六日葬于縣東漁隱洞巽向之原配草溪卞氏祔焉海州之吳以高麗版圖判書仁裕爲鼻祖入我朝有全羅道觀察使諱仁繼是公五代祖也會祖諱鷹軍資主簿祖諱億壽軍資奉事考諱山立以優老恩嘉善妣司諫梁思貴之女也五男達輝延輝遂輝逸輝建輝亦以孝友世其家道臣上聞有賜米之典逸輝氏與余善以公墓文見託余嘗聞風而激昂者久矣遂因其家狀而略加櫟栝繼之以銘銘曰

蔚彼丹山孝子之藏林壑沉沉迹陳名香唯其嗣述
之繩繩允矣源遠而流長

處士鄭公敷墓表

嘉林濱海江山之勝甲於湖右友人鄭大哉居焉以
清修力學爲搢紳章甫所推重今冢宰李公晚成奉
命巡撫薦其才識于朝不幸早世未展其抱負識
與不識莫不嗟惜焉大哉諱敷故海州牧使諱時亨
之季子也以 崇禎己亥閏三月七日生自幼凝重
端潔及長行誼純備能文辭善草隸先輩期以遠到
鳴於泮試農巖金公昌協誦其傑句亟加歎賞自是

擅譽場屋屢捷發解而畸於命竟至無成人皆稱屈
己巳丁內艱哀毀踰制己卯牧使公寢疾屢月扶持
服勤誠孝懇至及喪執禮如前壬辰入洛感疾以五
月十四日終得年五十四葬于林川家後枕戌之原
大哉孝友出人事兄姊歡愛藹然至其析著厚讓而
薄取二兄先亾奉丘嫂克盡烝嘗之享撫諸孤如已
出鄉隣化服有疑事輒叩質蓋大哉坦率簡默平生
無矯激之行忌忮之心人皆信愛之自孤露之後優
游於江山之間杜門端居博觀經籍手抄諸史作十
冊名以史雋浸灌其中樂以忘其窮阨最好朱子書

畱心爲己之學而常有晚悟難成之歎少日同隊并
列華要而未嘗一通書問人以爲難光州之鄭以高
麗門下贊成事臣扈爲上祖入我朝珪組蟬聯應
教熊當中廟朝以檢閱上章請伸佔畢濯纓之寬
士論違之曾祖諱保門縣監祖諱維光海時中司馬
立異於讎母之論走歸鄉里仁廟改玉首被收錄
官止白川郡守牧使公少有峻望見重於一時勝流
晚以循吏名己巳禍作棄官還鄉妣文化柳氏左議
政亮之後監察東發之女也大哉娶監司洪公歲女
生三男五奎五緯五雲長房二男二女仲房二男季

房二女嗚呼以大哉之才行早負雋譽空若大鳴于
世而竟齋志而歿天道不可知爲善者何以勸也雖
然今五奎克紹家傳知名士友間天之所以裕後者
其在斯歟余與大哉有連家之誼慣知其平日言行
茲於墓文之託義不敢辭遂撮其家狀敘次如右銘
曰
我佩之芳兮人不知何傷守分安命兮聊以徜徉
如斯丘兮吉士之藏孝子鑿珉兮千秋耿光

縣監鄭公津墓表

曩斯文變作誣詆之言至及於尤菴先生時則大學

生鄭公津以執綱主張齋議率多士疏辨逮己巳禍
慘又與數百章甫守闕號哭蓋用己卯故事也干時
火色彌天人皆戰慄而公獨確然不撓士林莫不欽
仰公字仲楫迎日人自羅朝宗殷始著於譜名臣碩
輔史不絕書爲東方大族近世文清公諱澈以忠清
剛介大顯於 宣祖朝位躋左相封寅城府院君與
栗谷牛溪爲道義交一時稱以松江先生寔公之高
祖也曾祖諱宗溟魁文科通政府使 贈兵曹判書
祖諱漫成均生員早世 贈吏曹判書三世墓文皆
尤菴先生筆也皇考諱慶演有隱德登上庠官清安

縣監 贈左贊成玄石朴公世采撰墓誌前妣德水
李氏後妣驪興閔氏學生光煥女以庚寅閏十一月
六日生公自幼厚重沉毅自以爲鈍根讀書嘗人十
已百稍長淹通經史癸亥成進士先進多器重之有
意拔薦公辭以業未就時論多之連占別試解額自
丁卯至庚辰屢於課製中選見拔公曰命也遂棄公
車業戊寅除 孝陵參奉後以都監勞陞主簿遷戶
曹佐郎癸未出爲永同縣監勤謹寬和刮祛俗吏干
譽之習吏民愛戴頌聲洋溢丁亥病遞歸京第以七
月四日逝九月葬黃金谷己丑五月日因宅兆不寧

遷窆利安面東來洞西坐之原前配靈光金氏祔焉
後配竹山安氏其考士人裕公有三女長適申錫忠
次任震夏尹源金氏出也二男長奎河次斗河歿安
氏出也申壻男瓚瓊瑜一男一女幼任壻一男三
女女適安錫龜徐命元餘幼尹壻三女二男并幼公
孝性篤至贊成公性嚴諸子定省之外不敢久侍而
公自兒時不離親側周旋應對如成人親心甚安之
及喪過毀竟致痼疾尤謹於追遠忌日哀痛如初喪
必思平日之所嗜竭心辦備送宗家助奠之官稟于
宗兄權奉家廟大小祀豐潔中禮先世墓山立表燔

誌割俸而經理之收聚諸宗支系錄成譜牒以爲尊
祖敬宗收族之圖此皆繼述之大端也嗚呼以公之
人地濟之以辨世之才儕流莫不以公輔期之畢竟
棲遲下邑壽又不永是何天道誠不可曉也余猥嘗
託交於公兄弟間情義深切自謂知公莫余若今公
之胤子以其叔父丈巖公命託余以表文余雖老病
將死何忍辭也遂披涕而題數行俾刻于石系曰
已巳之禍死生在呼吸而公之所樹立如彼其卓卓
眞所謂火炎崑岡不燼者玉也後之人編黨錮傳公
名必在上頭此足以不朽於千秋餘可略也

僉知辛公得中墓表

嗚呼此清安寶谷山面亥之原副護軍辛公之藏也
公靈山人中世有諱歲仕高麗爲政堂文學入本
朝世有大官至靈城君景行是我 宣祖朝勲臣也
靈城生諱勉主簿 贈參議參議生諱任副司勇司
勇生諱貞甲忠義衛是公之考妣星山李氏某官某
之女也公諱得中字時甫少遊尤菴先生門先生愛
之亦嘗以孝謹見稱於儕友間而數奇不成名晚節
緋玉非公之志也公甚不樂焉歲已酉感疾以三月
廿三日終壽五十八蓋公內行甚備事親養志無違

及喪毀甚三年不脫經帶祭先以敬一遵禮文友愛
篤至姊兄貧不能家甘苦與同視其子如子好施與
或見人無衣呼寒者解衣衣之公家嘗有子母穀公
取其券燒之曰利心長本性喪敦於媿睦聚族歡樂
倣古花樹之會又起一樓平臨廣野名以觀稼嘯詠
其間時時大會鄉隣情意歡洽聞者誦義不衰公凡
三娶元配昌寧成氏宣務郎震昌女生男大成次配
完山李氏將仕郎聖謙女生男大亨女長適士人郭
守燦次未行季配慶州金氏通德郎胤昌女生男大
衍大夏大雄大益女幼側出有一男四女男曰大昌

女適某次未行大成與郭守燦俱有一男幼嗚呼余
識公面於華陽山中三十餘年交好采溪今大成樹
表于公墓請余文之余雖老病昏耗何忍辭也遂泚
筆而書

進士李公炳墓表

往在光海朝良翁李公以直言黜海島其清名亮節
至今耀人耳目良翁有孫曰進士炳當己巳禍作火
色炎炎之中率畿輔士數百人伏闕抗疏力辨栗牛
兩先生之受誣坐謫端川其衛斯文幸世道者大矣
士大夫知與不知莫不咨嗟歎息以為有名祖風余

常慕其義而恨不得一接顏範今公之胤重協以公
墓道之文見託余何敢辭按狀公字文甫鷄林著姓
新羅開國功臣謁平之後也入我朝有曰誠中諡
靖順與伯兄政丞敬中仲兄霽亭達衷從叔益齋齊
賢俱以文章德業名厥後世祿不替有諱鸞 贈領
議政月城府院君諱惟一判官 贈左贊成寔公高
曾兩世也良翁諱翼 仁廟改玉授持平獻納不就
率官掌令考諱仁實以進士筮仕率官翊衛司司禦
妣淑人慶州金氏諱 社功臣持平 贈戶曹判書
月城君元亮之女以丙戌八月十七日生公幼穎悟

好學不煩教督而業日進尤長於詩爲一時儕流所推戊申乙卯遭內外艱執喪如禮丁卯補上庠自是懶治時文卜築廣陵之葛陂日吟哦其中屋前有雙檜除其下築壇設席客至與坐話詩終晷而已己巳被謫安之若命略無幾微見於邑秋適大旱遇赦歸則謝迹公車杜戶家居益無當世意遂搬移居忠州先壠下唯以講授諸子爲事良辰美景杖屨徜徉有樂而忘老之意甲戌正月二十六日卒于正寢得年四十九配恭人光州金氏佐郎振元之女貞靜淑惠甚有婦行公喪毀羸成疾後三年丙子七月五日卒

壽五十五有二男一女男長重國娶元鳴世女出後公伯兄通德郎諱烜先公一年歿女未笄後公一年歿次男卽謁文者文科方爲修撰娶大司諫洪禹寧女有二男二女俱幼公初葬于忠州先塋下夫人墓附左後改卜于某郡某向之原公姿稟溫厚德宇和粹恤姻親信朋友接人誠意藹如其在端川北土人士多從之學及喪有服練終三年者平居簡交遊罕言語退然若闔戶之處子而至其臨大節仗大義雖賁育不能奪觀於己巳事可知其一端矣嗚呼公之樹立既有來歷而又有賢子克紹家學妙年通籍士

望蔚然公之不食之報必將大發於後休哉銘曰
孫繩祖武義秋霜士流欽誦姓名香家傳正學玉署
郎我撮其槩昭無央

元公德裕墓表

洛城之東華山之下有宰如之丘是故篤行之士元
公公潤之玄廬也公諱德裕原州人上祖弘弼仕麗
位至知門下省事入我朝有曰冕右正言贈吏
曹判書原山君曰孝然禮曹判書原城君諡文靖高
祖諱純輔早以文行名司議贈左承旨曾祖諱士
悅典簿贈兵曹參判祖諱翕贈戶曹參判考諱

相統制使以廉儉稱妣貞夫人安東金氏參議公奭
之孫將仕郎暄之女以崇禎丙申十月二十五日
生公公晚為從叔父副司勇諱科之後以原川君諱
翮佐郎德水李穆為內外祖公性仁而剛方自幼於
鉅細事無所欺隱時能隨事進諫統制公奇愛之及
長學于喪齋李相國端夏喪齋稱曰清秀不俗誠實
無偽公於書嗜論孟小學於詩酷愛老杜往往有所
作甚有雅致篤於孝友常侍父母非有故不離夜分
乃退晨必衣冠而問寢戊辰慈夫人疾篤公衣不解
夜不寢手執藥餌半年如一日一日慈夫人痛甚不

覺發聲曰某兒聞否吾不忍見其焦煎狀已已禍作
統制公歸原州不仕癸酉公在京覲而歸者纔經宿
忽心痛蒼黃趨省統制公病已劇矣人皆驚異公前
後居喪守制過毀幾不能全家人屢請薑桂之滋則
拒之甚堅曰死生有命旣沒喪而創采慙喪餘追慕
一如袒括時事伯氏愛敬俱至伯氏卒于關西公奔
走號擗如不欲生推之宗族無親疎皆得其歡心周
窮恤貧衣服亦無所惜操守甚固屢隨統制公繁華
地一不爲聲色所撓立心以正制事以義常曰吾無
過人者自檢身心無所媿怍聞人之善喜如已有見

其非若將浼焉平生好端坐讀書至老不懈常戒子
弟曰士不學不可以爲人汝其勉之有過則必嚴辭
誨責不事生產被服朴素於一切勢利芬華泊如也
與人交久而敬雖狎拜揖必恭語不爾汝少事舉子
業旣孤不復就試筆勢豪健爲人所推而有求者輒
辭辛卯五月廿九日以疝症終壽五十六與恭人梁
氏葬于申坐之原其洞曰道川恭人貫瀛洲已卯名
賢校理彭孫之玄孫節度使禹及之女參議牛山安
公邦俊之外曾孫端莊淑明婦儀甚備事舅姑以禮
處妯娌以和撥貧以饒使公不知有無生于癸巳臘

月廿日歿于丁亥至月十一日有一男一揆三女適
宋徵休李夏茂俞彥宗一揆娶監役李著顯之女生
一男一女皆幼余觀敦行孝義不求人知者其後必
昌今公之胤子早年力學其進未涯公之未食之報
當拭目而俟之

李公命益墓表

公諱命益字聖俞或曰汝俞以 天啓壬戌二月十
八日生自幼聰穎善屬文及長治公車業癸未丁外
艱時渾舍染癘獨當初終戚易無違禮奉慈顏克盡
和婉時有老萊之戲己丑又失恃憂吉受易于允菴

先生潛心力索所得頗淡事諸兄甚恭湛樂不暫離
第三兄一病八年公奔走醫藥終始無怠於伯氏之
疾亦然視諸孤姪殆同己出屢中解額數奇不偶庚
午七月五日以疾終于家壽六十九臨終區處家事
整暇如常日九月葬于松谷負巽之原公識見通敏
凡士林有大議未嘗無公於其間出入師門觀感者
淡乙卯禍作益無意於世詩酒自娛以終其身平生
於財利淡泊一毫無營為甌石屢空而晏如也鄉黨
至今誦之李氏本出全義以麗太師棹為遠祖十代
至禮安君翊移封禮安遂為禮安人世有大官承繼

軒裳入我 朝翼襄公歲與金宗瑞拓六鎮有功開
封號五世而至從仕郎諱沆世居漢城客於報恩終
于旅次葬縣東松谷山屏菴具壽福銘其墓是於公
爲高祖也會祖諱擎宗教授王考諱彥進士受業於
大谷之門又與重峯遊重峯贈詩美之考諱晶生員
遊於大學時仁弘之客韓僧倡讎母論要與同事辭
而卻之徒步出城後乙亥與諸生參牛溪栗谷兩先
生從祀疏妣安東金氏主簿鳳瑞女也公之配新平
李氏雙梅堂詹之後其考士人振翰生後公三歲卒
於己酉八月七日與公同塋有二男二女男長松晚

次器晚女長適金顯基次適金碩徵側室男極晚生
晚孫齒莘趙重台妻長房出也次房無子以莘爲後
公之長胤父子與余善泣乞公墓文甚懇義不敢辭
遂撮其狀文敘次如右

進士李公命弘墓表

離嶽之下吉祥之村有清修篤行之士曰李公命弘
字仁甫文藝夙成年廿七中癸酉司馬三登漢城試
數奇不偶鄉人屢薦其行懿亦未霑一命以己酉五
月廿四日終壽六十三葬吉祥內洞西坐原公天性
仁孝事親盡其誠癸未丁外艱時毒癘熾蔓闔家熏

染而治喪罔愆守殯盡禮己丑居內喪哀毀致疾幾
危而僅全服闋與三弟比屋而居中葺一小構窮晝
夜不相離飢飽與共之所講者正修之工詩書之業
也撫愛諸姪無間已出與朋友交一以信義金獻納
錙具參奉鳳羽七八人最其莫逆也雅好水石相攜
於泉聲嶽色之間觴詠自娛不知老之將至詩調清
越意致拔俗觸境吟哦人皆膾炙而散逸殆盡有若
干首藏於家李氏分派於全義高麗太師棹之十世
孫寶文閣提學翊移封禮安遂為禮安人其後典法
判書竦被禍於辛禍翼襄公葺與金宗瑞開六鎮有

功歷三世而諱沆自漢城客於報恩歿而葬焉於公
為高祖也會祖諱擎宗教授祖諱彥進士遊大谷重
峯之門見重於士林考諱晶中生員遊太學時仁弘
嗾人發讎母論徒步下鄉謝絕世事妣安東金氏主
簿鳳瑞女也公配南原梁氏忠義衛諱之女舉二男
長守晚次慶晚三女適李楷黃載厚金碩標長房四
女適成益徵朴人虎金信重金百炫次房三男莢出
繼長房次苾蓬余與莢氏善來乞墓文義不敢辭略
書榷槩如右銘曰

閔彼靈區吉人之藏有屹桓楹令名流長

閔公德重墓表

公諱德重字才叔以崇禎己卯九月十七日生幼時不好嬉戲長者不甚課督而自能讀書人皆期以遠到善事親須臾不離側可以慰悅者竭其誠力親意安之其有不安節憂形於色及其疾就露立禱天輒得神效聞者以為孝感撫愛羣弟妹甚篤衣食與共斗尺必分襟懷樂易接人和氣藹然雖僕隸之賤未嘗以惡言加之然至其遇事變臨利害則以義裁斷如一刀兩段性又安詳雖尋常步履無急遽之容作字端楷終日不差一畫於此亦可見定力也師事

二宋先生專心為己之學兼治舉業而亦不屑於文詞族兄文貞公維重鑑識最高而許與甚重曰吾宗所恃者唯此一人而已及喪重為之嗟惜其歿在庚戌正月廿六日壽僅三十二初葬公州先塋側壬午十月日移窆沃川化仁村其原向亥閔氏起黃驪自奉御稱道大顯於麗至我朝左贊成齊仁以文章鳴號立巖曾祖諱汝儉文府使贈判書祖諱桓禁府都事有至行昏朝樹立卓然後旌閭贈左承旨尤菴先生銘其兩世墓而亟稱其忠孝考諱光炅抱德不仕妣全州李氏其考生員尚炫公配昌寧成夏

績女婦德咸備善事尊章居公喪積毀成疾沉痾終身年六十以己卯十一月初四日歿與公同塋其哲行懿範誌文詳焉男長鎮綱次鎮紘生員二女適俞命集宋姬弼孫宗洙顯洙處洙祖洙漸洙李世琰妻長房出也一女未行李房二女一歸徐宗甲俞壻男雋基宋壻男來禎來迪餘幼嗚呼公生質旣美德行純備又能早依大賢真實下工天假之年則必大有所成就而不幸短命而歿惜哉然公之諸胤皆承繼懿德知名士友間而內外諸孫亦漸蕃衍公之不食之報庶幾在斯天道其可誣耶鎮綱氏亦師事尤菴

先生與余有同門之契狀公行泣請墓文曰先人事行老先生所知也余小子何敢有一毫溢辭噫先生嘗臨尊考之賓階歎其勤禮其後鎮紘之冠也余亦承先生命猥當戒宿觀其拜揖中度儀文秩秩益知公家法之有自今於狀德之文遂不辭而泚筆銘曰好學短命聖所悲兮不朽非歿韓有詞兮孝子樹表闡厥潛兮我銘其顏筆不慙兮

宋公相元墓表

恩津宋君諱相元字汝善察訪諱國憲之孫參奉諱奎炯之長子生於癸卯四月十日察訪公每曰吾子

孫頗衆而所倚重者唯汝汝無孤吾望以故君常曰
余雖無似親承王父教敢不祇敬當祭之時雖割牲
滌器必躬自省檢無或少懈先親愛敬之人亦必愛
敬之少妹窮不自賴君終始養於家諸父家有喪葬
君躬泣事役不知其勞喜施與嗜飲酒與人處清濁
無所失以癸巳二月廿五日終得年五十一葬于清
州斗山先塋下午向原配潘南朴泰運女無子以從
弟相允子必浹爲後一女適閔宅洙生三男并幼余
嘗撰參奉公墓表世系詳焉此不著

趙公勝墓表

公諱勝字克已淳昌人高麗大將軍仁平之後牧使
項府使棕萬戶澣通仕郎世球是其高曾祖考也妣
義城金氏府使益謙女公生於 正德丁丑早業文
屢舉不中晚年專攻詩語多驚人筆法亦妙人爭傳
玩性嚴毅見人之惡雖隣比不與之相對論人淑慝
雖達官亦不饒以此鄉黨敬而畏之歲己酉鄉中修
楔請公爲掌議公見其約中有文士兄弟不相容者
恥與同約而辭焉後其兄附權姦告其弟謀逆同約
之人多司連公獨免於及人服其先見疎於財利有
一家人朶願於非理之物公略無吝意隨卽快與宗

威州里莫不多公之爲配裴氏萬戶遠期之女生四男德寬司猛德柔萬戶 贈兵曹參議德恭縣監 贈刑曹參議德儉司直奉事塾庠序閔希吉妻長房 出宣教郎圻埴堉堉典籍蔡翊先妻次房出將仕郎圻坪李認可李惟潔金璋妻三房出內外後孫多不盡錄舊有表歲久磨漶不可讀後孫泰運明尹等今將改樹謹撫其家乘略記如右 崇禎後壬午十月日 述

護軍朴公文准墓表

嗚呼此錦山道谷山負辛之原者潘南朴公文准均

伯及令人密陽朴氏之所藏也公生質甚美孝友睦嫻周窮恤孤鄉黨歎服與其弟文准至老同居黃耆鮐背相對怡愉人莫不艷之歲辛亥國大饑諸子輸粟補賑事 聞朝廷嘉之推其功授公通政後以優老 恩陞嘉善拜護軍以壬申四月廿二日考終于第公勤儉篤實康健無恙看書史教蒙學老而不懈奇哉公舊諱興准字起伯朴氏爲東表大姓麗末有潘南先生尚衷以尊攘之義著於史入我 朝亦屢代簪紳 贈參議諱溫寔公之曾祖也祖純武不仕考天斗武科奉事妣安人吉氏治隱先生之後學生

遠春女也以 萬曆丙午九月二十八日生公於錦山靈處里令人軍器寺正智壽女婦道甚備生後公一年歿先公卅二歲舉六男長承明次齊明以勇銳鳴世早歿次彰明信明東明其一歿二女適從仕郎朴爾吉察訪宋儒哲承明男性賢尚賢女張成翼齊明男忠賢女吳萬遠彰明男敬賢信明男泰賢女申光業宋廷輔鄭爾恆外孫希善明善萬善道善兼善好善行善吳徵遠妻從仕出也日晉日恆日臨察訪出也曾孫男女摠四十餘人萬善與余善一日列公世系事行謁余文於黃江之上其爲人余所信愛者

遂不辭而爲之銘曰

天餉善人兮壽考無疆視爾兢兢而秩秩兮我信源遠而流長

師傳成君 晚徵墓表

往在辛未歲達卿訪余於黃江之上觀其氣貌清癯見識超邁已知非塵世間人伊後數十年交誼莫逆喜其學日益新德日益進常幸此道不落莫矣辛卯上元以疹疫不起余誠痛傷如失半身今其孤爾鴻泣請墓銘余何忍銘亦何忍不銘達卿姓成氏名晚徵秋潭其號也以 崇禎後己亥復月七日生於尚

州興巖里學語知讀書甫齟吐辭驚人九歲失恃執喪如成人十六從伯氏獻徵受大學靜坐涵養若有契悟賦一絕曰無上亦無下無始亦無終若人問此物萬殊一源通伯氏喜曰粗見體用也伯氏嘗演奇門遁甲法達卿一見便通伯氏曰吾曾留意於此已覺悔恨淡恐外馳切宐戒之達卿卽止之十八喪伯氏益自奮發作學聖圖且爲文屢百言以自警庚申拜尤菴先生于華陽洞丙寅以親命赴鄉解得捷明春赴省圍路遇術士術士贈中正之心信義之風煙霞蹤迹雪月襟期十六字不言其名而去戊辰丁外

艱哀毀幾不全送終之節稟于華陽率禮因愆丙子丁時翰等誣詆尤菴達卿率道內多士痛辨之大小文字皆出其手士論韙之癸未薦補內侍教官又拜王子師傅皆不就甲申參萬東廟 皇祀嶺人以爲非其鬼而祭之譏議紛然達卿立說以辨以南軒之祭虞帝楚民之祭昭王爲證辭極明白頗有渙然開悟者己丑將卜居于聞慶雙龍洞遂與湖洛士友結契以禮義忠信賙窮恤喪等條略做石潭鄉約而事未及就庚寅送子黃江以朱子送受之書惓惓囑付時從弟患拘忌疾不忍遠去治喪訖始入內院菴

竟不得免壽五十三病中間有副率除命而未及
遣辭狀以五月廿日葬于州西於山午向之原昌寧
之成以高麗太子中允仁輔爲上祖自是簪組相承
有曰士達大提學諡文孝入我朝有曰世平觀察
使是於達卿爲五代祖也高祖諱灑佐郎贈參判
號聽竹以學行名曾祖諱汝栢宣教郎祖諱震昇早
登司馬丁丑後杜門守貞考諱虎英見重於士友間
妣德水李氏通德郎東野之女玉山蒼石是其內外
先也達卿娶南陽洪氏其考通德郎震大也生一男
卽乞銘者女適士人韓德全達卿和平正直天性近

道早歲專心聖學精詣實踐多有自得之妙嘗曰聖
人全動靜之德而必以靜爲主學者捨主靜一著是
不識急先務也又曰程子所謂靜後萬物自然有春
意者方覺有味人或曰如此則無乃近於陸氏之專
務尊德性乎達卿笑曰如車兩輪如鳥兩翼寧有捨
一而能行能飛者乎然俗學徒事道問學多欠本源
工夫故吾言如此耳教學者必以立志爲先收放心
爲要以故雖蒙學皆獲其益平居出言簡重而若論
事是非人淑慝截然有不可犯者嘗曰允翁之闢尹
鑄功不在孟子下也至於治法之得失兵政之變通

未嘗不講究而亦未嘗對人言也若其居家則事親盡其孝居喪盡其哀祭祀極其誠敬每日晨謁家廟友愛篤至事丘嫂如母愛孤姪如子推以及於族黨各得歡心從弟窮甚無所於歸分田割宅略無難色人皆歎服及其歿也官居野處如喪親戚所著述有嘉言汎錄會心錄詩文若干卷藏于家嗚呼達卿之嘉言善行非數尺之表所可殫記蓋其稟質明粹又能好學孜孜用工老而益篤以至鄉黨服其仁士友欽其德由此以往其至難量而天閔其年未展抱負豈非命也達卿以我有一日之長遇我甚恭真所謂

讓抗慙丁也顧惟世道日下斯文益孤歲晚心期唯達卿是仗今焉已矣孰知我悲唯幸胤子善繼家學時聞精妙之論典刑猶存此足以慰我老懷而亦喜堂構之有其人也

金君夏行墓表

安東金道以遣其胤春行乞其少子夏行之墓文曰
亾兒生而有邁往之氣孝友得於天文才拔羣七八
歲已有奇警語及長專用力於經史於左國資治尤
著工其所手書者成六七卷治舉業率中程式最長
於詩間選解額如古詩近體見許於具眼長者筆法

亦早成儕流咸遜一頭地有志爲己之學嘗出入農
巖三淵圃陰之門得於觀感者頗淡不喜芬華耽嗜
幽靜且好山水遊每與其兄讀書於杏湖以爲至樂
癸巳四月先君子棄世亾兒哀慟踰節不覺內傷閏
五月十一日感疾不救得年僅廿三娶別提趙正綱
女舉一男不育取宗人令行之子履遠爲後所著述
若干藏于篋笥噫吾兒資質超凡所期望不淺而不
幸短命吾旣哀其死又憐其才行湮沒無傳要得子
一言以賁泉塗嗚呼此真所謂秀而不實者歟道以
之悲念痛切安得不然也余聞至德之世父不哭子

顧今世道衰末理多反常則空乎才賢之士不得其
壽年也然退之有言曰死而不朽孰謂其歿又曰願
勿永傷以慰孝心唯此數語抑可以少紓道以之慟
也否道以名時佐有學術爲士友所推重其考諱盛
最忠州牧使祖諱壽一敦寧都正曾祖諱光煜左參
贊金氏以高麗太師宣平爲上祖道以娶德水李氏
學生斗夏女以辛未五月廿一日生君字子亨云

成君必升墓表

漢師終南之陰士人成允甫居之篤孝人也其父縣
監公歿允甫邁癘濱危至啓殯始成服至痛在心如

不欲生賴慈氏救護得不滅性嘗作怨厲賦以見志自是口不近滋味心不萌世念以偏親在堂強抑至情盡力於菽水之養及慈氏病革允甫引小刀裂指取血和藥而進及喪直情徑行餐粥不盪擗踊無節至於哭不能聲起不能立柴毀日甚過卒哭與訣伯仲及諸從議定後嗣處置家事訖揮婦女出悠然而逝卽乙酉五月十日也壽四十用遺命葬縣監公墓右其地仁川新峴其原負酉也允甫色溫而言簡絕無修飾容平居淨掃一室左右圖書穆如也嘗語子姪曰祭祀不謹則祖考不享亦子孫興替所關也手

抄家禮備要參以澤堂所記草成一通祭儀臨期齊飭將事肅敬誠文可觀也臨終語其人曰左氏春秋吾所嗜也欲置棺內果合禮否其問于先生長者又曰初終一從士喪禮襲斂諸具務去華盛此可見平素所存也君諱必升允甫其字也昌寧之成爲東方大姓高麗中允仁甫其上祖也縣監公諱虎烈階通政妣文化柳氏司禦時亮女君之配清州郭氏其考都正昌徵仁慈淑哲善事舅姑在君喪致毀後一年歿附君墓左所後子道常一女未笄道常一男一女幼世系具載大碑碣嗚呼居喪盡禮古人所難君之

外先柳氏仍三世以孝行聞宋文正先生立傳而褒之君之兄必恆亦有孝德魯齋李相公論撰於墓石今允甫之至行又如此郭氏亦不勝喪而歿奇乎哉異時纂三綱續編將大書特書不一書矣郭氏余之姨妹也嘗稔聞其事行今道常來謁墓文不辭而爲之銘銘曰

人孰無父母鮮共子職也吁嗟乎允甫制行之特也我聞其幽烈不肖者之但也

舟村申公曼墓表追記

公之平生志節尤菴所撰原表詳矣噫後世可以知

公矣唯江都之亂洪孺人以 嬪宮命與呂參判爾徵夫人偕入行宮西樓賊陷內城孺人與呂公夫人一時立慳俄而賊焚西樓灰燼之中形骸莫辨遂俱葬于楊根水青里同原異塋此蓋清陰慎齋二先生所議定者其後子孫不敢移祔於公墓者以此也朝廷嘉其貞烈與韓端人并有旌閭之 命而公以爲春秋之法賊未討不書葬不建棹楔焉已巳海上之行先生又書 大明天地 崇禎日月八大字以遺其子孫於此可見思公之心愈久不已而其所以顯微闡幽者亦出於衰世之意也歟禮山章甫慕公風

節有祭祀之議而鄉言或有不咸者姑俟異日之定論云日華三男愈慤慤一女未行尹謚所後子師齊

領議政李公會墓表摠論

覲其平居則從容禮法之士也論其用工則篤實進修之儒也孝悌之行洽於家庭而鄉隣服之睦婣之義周於宗黨而遠近誦之進而居於巖廊則為百僚冠而想望至治退而處於江湖則與漁樵友而淡若寒生若其文章精密典重絕無藻繪之態真儒者之文也昔歐陽公善於政事而為文章所掩若公政事有餘不為所掩何其備也全德完名世無其匹儻於

古人中求未知與韓范諸公何如也且丙戌所遭實大禍所關而屢月金吾門外不動毫髮斯已難矣如丙申之疏明白剴切極有闢邪之力 聖上之廓然大悟快定國是者未必非公之效也其功亦大矣公不以余鄙卑許以莫逆之契六十年如一日余亦自以為知公庶乎無微不盡今公之墓草屢宿獨臥空山悲懷填臆公之胤台鎮與諸從託公之墓文何忍辭也只以垂死危喘無以鋪張德美略書數行俾刻于阡表重可悲也

先生末年睡谷子台鎮來請墓文而疾勢沉篤不能鋪張敘事先作摠論未及卒篇而先生奄棄後學本家子孫遂以此入刻於表陰云

參奉閔公鎮夏墓表追記

茂弘余之知己友也望其外如玉樹臨風卽其內如古井無波析理則雖衆所聽瑩者如竹破冰解事是非人淑慝瞭然一無所失持衡士論以義裁斷不容親好顏情文詞敏贍操筆立就而皆膾炙人口天假之年則必大有所成就而不幸短命嗚呼惜哉其配恭人楊州趙氏忠貞公啓遠之孫監司龜錫之女密山君潔之外孫氣度峻烈有丈夫風聰穎絕人略通書史十七歸閔氏閔氏族大以禮法正家恭人以冢婦入門事舅姑處娣姒動遵儀範宗黨嘖嘖丁巳洪

夫人下世恭人上奉烝嘗下撫親屬無一毫不盡分者最憐小姑之零丁鞠養嫁遣恩意隆洽小姑亦仰戴如母常以未亾人自居喪食十年幾危幸蘇祠宇寢堂歲久頽圯經理而一新之獨持家政三十餘年綱維肅整爲一家則宗洙早歿取其弟承洙子之教以義方俾至成立其嘉言善行可爲彤史之特書者甚多而不盡錄己丑三月廿日歿得年六十八始茂弘自天燈山下移葬于堤川遠西府尹公墓下至是穿其左而耐焉承洙教官有一男五女女適李綬李鼎輔洪啓重餘幼原記尤菴老先生筆也時恭人在

世故不錄其事行今教官屬余追記謹撮其大略而書之

仲弟尚明墓表追記

歲己卯因舊山不利移窆于堤川治西門巖洞負癸原壬辰子月廿四日孺人李氏歿而合祔于右觀察公卽石室金先生之彌甥卒官左議政爲世名臣其配鄭夫人郡守昌徵之女右議政維城烈士忠貞公洪翼漢爲其內外祖以壬辰四月十三日生孺人性沉重端懿自幼有成人規度於女事無所不能又能通大義慮事深遠長者甚愛重之有難決事必問及

遭議政公喪年已衰老而率禮唯謹服勤於鄭夫人終身不替其事舅如事父母處娣姒如兄弟視諸姪如子女治家有法御下恩而威不使有出入言家雖貧恤人之急如不及聞隣有所不知婦人纔產而家失火亟具羹飯饋之得以保活不喜巫祝戒婦女勿近嘗避寓峽村其家所奉神箱自墜於地後寓他舍亦然此可以見其人矣余恐閨門事隱世未有知之者茲并記之以眎穉昧季子名瑩女爲黃植妻次不育寢之男曰初性德性女壻金漢房一女幼側出男曰善性初性二男祚應瑞應二女幼

孺人宋氏墓表

松都留後宋徵殷質夫余戚弟也有一女甚愛之十六歸于李生泰躋二十八而歿余聞而悲之今李生要余識其墓李生亦與余有四世好余何可以不文辭竊觀其行錄孺人以己未三月五日生姿相豐端平居語言明侃服食節適孝父母規夫子周內外宗族辛巳舅參贊公退去牙山轉向西原孺人從于艱難竭誠養志甲申還京乙酉留後公丁大夫人憂孺人隆暑臨喪而病翌年正月二十二日遂不起以其年三月葬于鐵原觀音洞坐卯原從先兆也宋氏籍

礪山高麗中贊致仕貞烈公松禮之後爲世大族有諱克訥參議諱時喆承旨諱光淹都事是留後公之三世也留後之配驪興閔氏李則我世宗大王別子寧海君瑋之十世孫曾祖諱時萬觀察使祖諱伯麟持平父彥綱卽參贊公也孺人生一女一男幼嗚呼以孺人之淑德懿行空若壽祿空家而不幸短命何哉豈以受氣之清而數之局者物理之常也耶李生能文好善而與世疎早謝公車守志不苟其言可信故遂因其狀隳枯俾刻于石

寒水齋先生文集卷之三十三

寒水齋先生文集卷之三十四

行狀

皇考執義府君行狀

先府君諱格字正叔系出安東始祖諱幸本新羅金
 姓也甄萱之難守古昌郡憤宗國敗亾佐麗祖為復
 讎計麗祖以炳幾達權賜姓權陞郡為安東府以昇
 胙土封大相位至三韓壁上三重大匡太師十六世
 有諱賑判宗簿寺事致仕追封都僉議僉議生諱興
 典工判書判書生諱參八我 朝司諫院右司諫
 贈議政府左參贊修文殿大提學提學生諱克和魁

司馬刑曹參判寶文閣提學 贈領議政議政生諱
城行議政府右參贊策翊戴佐理兩勲封花川君諡
襄平公襄平生諱曼衡司憲府監察監察生諱鉉僉
知中樞府事寔於先君爲高祖也會祖諱大成活人
署別提祖諱霆中進士契樹道察訪有隱德淳行嘗
於牛溪成先生之受誣於仁弘也不畏兇焰抗章力
辨士論躋之考諱聖源善山府使少遊太學執耳齋
議乙亥兩賢從祀之論實主張之爲士林所推服尤
齋宋先生銘其碣事實具載焉妣淑人晉州姜氏同
知敦寧府事兼副摠管諱善餘之女府院君諱啓庸

之後也以 泰昌庚申十月初四日丁未生先君先
君生而穎秀色粹氣清自在髫齡峻儼如成人甫七
八歲已解屬文往往有驚人語先輩奇之及長績學
種文長於詞賦每就藝苑輒居前列庚寅司馬辛卯
擢庭試第二名選隸承文院權知副正字兼春秋館
記事官實錄郎廳壬辰陞正字會當簡選新進當路
宰執爲其族人圖圉甚力至以利害怵誘之先君以
其人負重累執不許當路衙焉坐是頗抹撥癸巳歷
著作陞博士冬由侍講院說書遷承政院注書無何
遷說書甲午陞成均館典籍禮兵二曹佐郎移司諫

院正言時諫者金弘郁被拷死金吾郎以拿來滯時
又將就訊 天怒震撞人皆惴慄雖素號剛直者亦
囁嚅莫敢言先君拜 命卽發停鞫之論諸僚不從
遂引避見遞尋拜禮曹佐郎司憲府持平忠清道都
事兼春秋館記注官丙申爲御營備局二郎廳轉侍
講院司書秋除湖南掌試官未及行復拜持平時
孝廟爲奉 慈聖營作萬壽殿會西南災沴極慘先
君以爲此舉雖出於誠孝土木非其時請輟役以應
天公議多之由兵曹佐郎復拜持平上疏切諫 大
內營繕安興築城之弊極言內外幹事之臣剝民督

役以爲術能要寵之計 上亦不採用大司憲閔公
應亨於 筵席啓曰權某有諍臣風節不可暫離臺
閣 上領之俄以司書復拜持平丁酉有覈蠲海西
逋欠之舉廟堂請擇遣都事以昇之銓司以先君應
命時公望蔚然而有是除名爲遴揀而實外之也
旣赴海幕悉滌虛簿以刮宿瘼西民賴之事竣省覲
于京城大夫人素抱沉疴至是症復欲奄奄在牀席
先君嘗藥侍側不忍捨去監司以久不還任 啓罷
臺諫論以厭避 上命復除外官以懲之戊戌乃拜
高山道察訪先君不以幾微見於色辭怡然赴之高

山當北關孔道乘傳者多越法濫責郵卒不堪命先君執三尺不撓雖監司至必據例給乘監司之子嘗聞病急赴請得下騎亦不許監司甚敬重待之益厚以此一路蘇息馬政大舉已亥今上嗣服召拜正言先君以被彈屬耳陳章固辭不得請庚子拜兵曹佐郎司憲府持平俱以相避辭遞由成均館直講復拜正言時南原府使金益勳因私憾推捉士族婦人僇辱備至且私逆孽之妾盡占其財名行掃地世所唾鄙而以其族大人莫敢誰何先君直舉其罪請削仕版衆口譁然併力伸解同參僚長亦以失實自咎

而先君執前說愈確由是側目者滋欲齟齬之其後再入玉堂之選忤下都堂又議中書之薦亦被沮戲人或勸以少刑方以自全先君曰非敢故爲硜硜也只欲盡職責耳終毅然不少撓人服其所守嶺南歲大饑齊民舉草食而朝家經費不贍督賦如舊先君請移江都時粟以補國用姑緩租稅少紓其急上採納之初孝廟昇遐大王大妃服制未定儒賢據儀禮賈疏體而不正之說初擬不杖菴兇人尹善道外托論禮陰欲害正上書熒惑禍且不測詖邪之言日益昌熾先君與同志諸公請正邦刑以定國是

右尹權認疏救善道先君又駁罷之認退適郊甸
上命遣承旨慰諭以八承旨朴世城以爲大臣之外
曾無此例草寫稟 啓日晚未及上 上以世城慢
君逆命 特命拿鞠先君苦爭之 上震怒夜半下
嚴批摧折極峻先君辨之益力言甚截直 上初
不從居無何果寢 命遞拜兵曹正郎兼春秋館記
注官參修 大行王實錄冬拜持平充冬至使書狀
官赴燕都譯鞮輩素聞風稜無不悚息帖伏一行肅
然行過西關監司金公汝鈺厚贐銀蓼先君曰路需
已贏受此無義卻之甚固監司強請至三則先君卽

散輿在座者無所自有金公亟稱其廉白云其在燕
也可汗死我國使臣當入參哭班而先君病獨留館
彼大疑詰之胡譯通官輩立門咆哮恐劫萬端一行
皆驚怖遑遑先君辭以疾篤竟不應至其成服之日
彼以胡制喪服遺之俾我一行服而入參使臣倉卒
無以處變其勢將從其言先君強起謂使臣曰不可
未有 本朝之命而遽服此制將何以歸解於 本
國乎吾輩方持 先王大喪白帽團領隨在行橐吾
輩當服此而已諸公盍以死爭之使臣乃悟遂以方
便周旋於其所謂禮部者畢竟果無事於是一行相

謂曰微君吾其左衽矣嘖嘖歎服辛丑春復命拜
兵曹正郎遷正言時判中樞趙絅稱以應旨爲善
道訟寃至有善道左袒孝廟之語其用意回險先
君首發削黜之論尋以事辭遞復拜持平則趙絅請
黜之啓上下相持者已閱月矣時議轉輾以初擬
輕律爲非先君遂陳已見於自列之章玉堂以此
啓遞秋爲訓局郎出拜江陵大都護府使其莅邑也
仁煦婢寡威束姦強而自約如塞士嶺東歲歉江陵
被災尤酷而監司不以實啓凡催科索租與稍稔等
民不堪其苦先君下車卽歷陳鄙屋愁歎之實仍條

列拯救之策封章上請監司恐朝廷知其諱災狀
從中壅不聞先君乃節縮冗費推贏補虧以省民
徭公私多賴府境有空曠地數十里流氓火耨以生
內司以中旨將設主家庄貴戚移書論其意俾絕量
以入先君曰奪民利以媚上吾所不忍邈然如不
聞也壬寅丁外憂喪出善山任所奉轉歸葬于故山
克盡其誠禮焉乙巳正月服闋拜司憲府掌令時許
積新入相輿論未厭前掌令李整抗疏譏斥上命
削黜李整先君與諸僚力請還收上震怒夜三鼓
下備忘并與李整竄逐荒裔卽日督發政院三司

苦爭不納領相鄭公太和左相洪公命夏李相國景
奭俱再上劄分疏 天怒稍霽減以削職已而因災
異收敘拜掌令辭不就三月丁內艱丁未制終由成
均館直講移司諫院正言上疏論闕失其目有三一
曰人君語默動靜若天之雨暘寒暑萬物咸覩人皆
仰止近聞新下令甲 筵中說話一切秘之至使三
司亦不預聞是閉耳目而責聰明也二曰宦侍之設
只備灑掃宮庭今玆 永寧殿修改之役既畀之於
大臣而又令中官檢其勤慢是不信宰相而信奴隸
也三曰 殿下尊賢而不能去含沙

射影之徒乘時相機敢進嫁禍之言而猶且諉以應
旨終不加罪大聖人聖讒之道恐不當如是蓋爲
當時卽事而發也尤惓惓於勤學問正本源應天保
民之術論者稱其剴切 上亦嘉獎之時殺人者李
溫因審理蒙宥先君曰所謂審理者審其寃而理之
也溫之罪旣不能自掩安有涉寃之端乎遂據法爭
之 上不允妖人黃孺李碩馥輩受姦黨嗾接武投
章構誣一時士流辭極慙淡先君請鈞覈指嗾人以
正其罪其黨患之諉以過中 啓遞之六月有唐船
漂泊濟州一行百餘人皆服華服語華語亦有通文

章曉事理者其言曰 永曆皇帝方保有江南克紹
崇禎之統守臣上其事 朝家將執送于北先君
拊膺涕下曰是可忍耶誰爲畫此計者國事至此吾
雖不在言地豈忍含默使吾 君負不義名也遂奮
筆草疏痛陳君臣大義有讎視 上國之人投之餓
虎之口甘心得罪於天下後世等語書上不報蓋
上意淡欲納其言而大臣執政內懷懼懼力主執送
之議事果不行忠志之士至今骨寒心痛而益服先
君之義烈誦之不衰秋歷司諫院獻納司導寺正復
拜司憲府掌令 引對論時弊三條其一宮家劫掠

漁商恣行龍斷也其二各司侵捉江船船人失業也
其三訓局使軍兵坐市專利市民怨咨也併請禁抑
上皆採納承旨閔熙行檢素歎與其弟點張樂歡
飲於其從妹殯傍是日卽 國忌也點以此先被臺
彈而熙佯若無與晏然翱翔先君劾其蔑禮喪廉冬
復自獻納移侍講院弼善上疏略曰 王世子聖質
天成誠國家之福也作程時習之功一日斯急而近
因祁寒久停 冑筵蓋出 聖上唯疾之憂而秋冬
羽籥亦合節宣之道養正之方不容少緩也且寮屬
具員而無保傅之嚴講讀備禮而無箴規之切宜致

巖穴之賢以資薰陶之益而頃者贊善宋浚吉之再
辭其職也連下遞差二字殊無側席如渴之意臣
竊慨然上浚嘉納之戊申拜獻納司諫者各二掌
令者一執義者五一爲濟用正再爲司僕宗簿二正
而內乘太僕之常帶編修官宗簿之例兼也其在薇
垣也應旨上劄有曰宗戚畹連禁中宮闈不嚴
宮奴肆行威暴小民多怨徒事文具未盡應天之實
惡聞忠言疎斥敢諫之臣終以誠正二字爲建極表
率之本上稱善是歲先君在臺閣最久入以告
氈廈出以進章奏前後所論列總累十餘件故進善

趙公涑有冰玉清操請加褒贈以振頽俗左尹權
坵數敗倫常請削仕版以礪世教李正英爲亞銓駁
以望輕柳俊昌入銀臺劾以酗病別旗徵布湖西之
痼弊也請罷之坊民權參地部之苛政也請革之大
司馬請加選武科大將敢辭職榻前並論之其餘
糾正官邪開達民隱者亦不可一二數己酉由侍講
院輔德復拜司憲府執義時尤齋宋先生際遇隆洽
方有所設施朝野拭目而刑曹判書徐必遠固守謬
見妄自詆斥先君以爲妨賢病國請削黜上不從
三月上行幸溫泉忽有砲聲起於駕後蓋大將

柳赫然使牙卒中虜也先君進曰軍中戲劇自有常律請亟正邦憲上不聽初上以特旨擢閔熙爲京兆尹熙權門狎客也驟陞卿位時論不愜臺諫屢請改正上猶不許大臣因其辭疏白上遞之都承旨張善激進曰初出睿簡本職雖遞資級當仍存物情皆以善激爲失言先君遂劾善激仍請還收熙新資上大怒卽命罷職至以行私不正巧猾姦譎等語斥之政院再三覆逆兩司交章力爭上皆峻批拒之玉堂諸臣及白軒李相公俱上劄論辨上亦不從時同春宋先生畱侍春宮驛馬上諫

其略曰臣始赴朝竊聽輿論以臺閣風采許金澄權某以恬退學識許李尚真李端相臣誠嘉歎以爲此國家之寶也曾未幾而澄與端相俱蒙寵擢遠邇歆聳咸以爲此獎直褒恬之舉謂某亦必長弟登進而今忽以人臣不忍聞情外萬不然之教加之人心沮喪直氣摧折譬如草木方生蕃茂可望而嚴霜忽下枯落無餘噫此豈國家之福而曾未料聖明之有此過舉也伏願快示悔謝之意上雖優答而猶不準所請疏再上語益勤懇上乃許之後又登對極言上教中姦猾巧譎等語之未安上卽命

政院刪去之自是兩司缺亞長天曹輒以先君首擬而
上終慳恩點人咸曰 聖朝不能容直士五月
拜掌樂院正十月以按武御史閱兵于水原府庚戌
除侍講院弼善兼春秋館編修官知製教辛亥 王
世子將納嬪禮過後弼善例有陞資之典時相素慕
先君有撼撓之言先君遂力辭得免移拜太僕正四
月末不幸遽疾越五月初四日甲寅考終于城南第
正寢享年五十二計聞 賜賻如例因堪輿家涓吉
之忌權窆于先塋側用壬子十一月二十六日丁酉
移葬察訪公墓右坐西向卯之原卽清風府治黃江

北岡也先君天分甚高儀度端莊簡而坦率不爲表
襮溫而淡泊不喜芬華平生未嘗飾貌軟語亦未嘗
大其聲氣雖造次無遽色雖甚歡無劇笑燕居沉默
穆如也與人處去畦畛油油如也性仁孝養生竭其
愛敬送終盡其戚易奉先殫其誠禮事季父篤謹季
父歿自殯斂至完襄皆親庀而罔不慎季母孀居俸
入必析分以資之於舅氏亦然及喪以壽器杉材賻
之每念外氏衰替於屢代墓道俱無繫牲之具遂求
文伐石竭力經紀尤篤於媯睦內外譜牒旁搜廣鳩
以盡尊祖收族之誼無論疎戚遠近顧恤存撫咸致

其恩義宗族之窮無依者歸之如家處朋友情義兩至於貧交尤款款焉不以升沉窮達易其志一如布衣時人以為難歷官內外家益旁落弊衣或見故絮而不以為意困屨朽如無甌石之資而聞人有急必濟之慎於辭受不以其道雖小不取然近名之清絕俗之介亦不為也恬於得喪無逐逐榮進意視世之翕翕熱者若將浼焉以此與世寡合門無貴勢車轍每公退輒淨掃一室只以書史自娛有時時花灌圃嘯詠其間客有會心者至則必命酒呼茗其樂衍衍晚嗜先儒切要之書於近思錄心經聖學輯要諸編

用工最濶博考諸家吐釋訓義錄諸紙顛以玩索手寫周易魯論庸學以優觀覽於行路旅店亦不廢扁所居堂曰六有益取張子言有教動有法書有為宵有得息有養瞬有存之意也常謂子弟曰吾為博士業所誤虛拋半生今吾已老矣雖悔莫及汝曹勉旃嘗愛韓魏公臨大節處危疑苟利國家知無不為等語及其詠雪詩老枝擎重玉龍寒之句書諸座隅朝夕諷誦以自飭礪愛君憂國得於天性耿耿孤忠可質神明至於事是非人淑慝剖之不苟守之甚確秉直持正不顧衆咻立朝二十年在臺閣者首尾餘十

年知無不言言無不讜常以激揚繩糾爲已任不以禍福榮辱動其中以是雖見重於公議亦以是大見忤於當世修郤之徒肆然搪遮而且無推轂者可以引重故官止是而已亦命也耶以其補袞之忠澤物之志終不得大展布其底蘊而年又不滿周甲善不能受福仁不能享壽何天之卑之者斯豐而報之者斯吝也嗚呼痛哉嗚呼痛哉先妣淑人李氏咸平望族敦寧都正諱楚老之第二女王考諱春元官嘉善監司以文章清節顯於 宣 仁間世稱九畹先生妣密陽卞氏宗親府典籤諱悌元之女也先妣資稟

淑哲識慮明透曉義理儘縝密諸事情儘練達親黨信服咸稱曰女士也恪事舅姑順承君子滌滌必親不經手不敢進家素貧乏而不以勤苦形於外僦勉有無恆置甘藶以待不時之需至於賓餉尤致謹焉咄嗟之辨輒有異味室如懸磬而人不知窶色聰悟絕人於文字不學自知涉獵古今書籍略通大義每以三綱行實訓子女俗諺俚瑣之書不掛眼不喜巫卜浮屠之說屏去浮華奢汰之習閨門之內肅如也先君或有所失必從容規諫居家莅官裨益弘多先妣下世後家政日塌然先君每悼念曰家貧思賢妻

信非虛語也嘗欲手撰誌銘以識懿行而未果焉先
妣生於 天啓壬戌十一月初三日年十有五歸我
先府君先先府君八年而卒得年四十二與先府君
葬在同塋先妣所舉凡十餘數而夭闕者過半終育
三男二女男長尚夏進士次尚明尚游向學女長適
士人朴泰迪次未笄尚夏娶縣監李重輝女生一男
曰煜尚明娶縣監李世白女尚游娶牧使元萬春女
俱有一男朴泰迪有一男一女并幼去年春先君見
時事漸不如所期忽忽有不樂仕宦意欲決歸松楸
以保晚節而顧所帶是 春宮贊導之職大禮在前

不敢輕退命不肖孤先往治菴裘指以端陽節祀爲
相會期五月三日夕家奚傳先君手書乃感疾之第
四日所裁也筆畫交辭一如平日念侍藥無人一日
二夜奔三百餘里及至則先君已棄不肖孤矣不肖
孤不孝無狀生不得竭力致養恭爲子職病不得手
執藥餌左右扶將歿不得永訣於終天之際而頑鈍
無知又不卽自滅忍至今日此何人哉此何人哉蒼
天蒼天曷有其極今則窳窳已掩矣竊恐先府君之
德之行之在人耳目者日遠日忘不能早託不朽之
傳則是重罪人之不孝也其罪又益無所逃故謹撫

書世系事實如右庶幾得大君子一言之惠以傳來
裔少伸罔極之痛而荒迷摧隕序次無倫唯幸垂省
而財酌焉不肖孤尚夏無任泣血哀懇之至

僉正 贈參判姜公 秀崑 行狀

公諱秀崑字汝鎮姜姓其先晉陽人昔隋煬帝東伐
高句麗時有高句麗都元帥以式大破隋兵名震三
國此晉姜之始也然世遠譜不著代至高麗有國子
博士啓庸佐金方慶征日本凱還策功封晉山府院
君由是益昌大歷五世而珪組蟬聯入我 朝曰淮
伯都巡問使曰淮仲都摠制昆仲俱爲國初名字淮

仲之曾孫曰永善君漬錄靖國勲 贈兵曹判書判

書生世瑛軍器僉正僉正生礪中司馬 贈司憲府

執義執義生應運 贈吏曹參議寔公之 考也初

宗室文川正壽甲有女子子幾人其一適潘城朴應

順誕我 懿仁王后封府夫人其一歸于吏議公以

嘉靖乙卯七月十一日生公公生七歲而喪阿氏

又七歲而孤家素貧祖母洪年淡府夫人憐之取而

鞠之如子公亦母事之自幼及壯而有室未嘗去府

夫人第然公朝夕往省祖母甚勤雖寒暑風雨未或

廢焉一日府夫人饋公葢穀公受而懷之曰有老人

在獨食不忍也府夫人感其孝日給甘旨以成其志
甫成童就教官裴某學執弟子職唯勤三年如一日
教官善病公與同門柳參贊澗左右服勤日夜不懈
藥餌必嘗扶持必親教官卽世每遇忌日輒喪食齋
居至老不衰壬午筮仕補昭格署參奉屢轉爲漢城
參軍壬辰之難扈 上西行在途賊報日急 兩宮
分蹕禁旅蒼黃后妃家將不相及 上命公領護大
小皆屬之蓋 上雅於椒親特信公故也尋遷工曹
佐郎明年癸巳自 行朝拜高敞縣監時當亂離飢
荒人相殺食公至則竭力經紀以濟窮餓遠近聞風

全集而仰哺者如歸市故舊親戚之自北來者日且
數十百公歎曰吾固知國有法彼皆窮來歸我獨安
忍持梁刺齒肥哉遂縮衣賤食折甘分少所全活不
可勝數居數歲餉船覆公坐罷民曰賢太守去矣吾
其奈何訟於按使乞以千斛贖之而不得則遂爭持
牛酒涕泣送之後又歷踐祥原安山槐山三郡而入
爲敦寧公正光海時十年不遷歲庚申屬疾以五月
十六日終壽六十六九月葬于廣州龜川里坐寅之
原從先兆也是日也故素咸集如喪其親戚親戚之
流落遠方者千里重繭而至皆行哭失聲虞車之返

出國門而弔者五百餘人斯所謂未施哀而哀者耶
何令人感慕至此哉朝廷記公扈 聖勞初 贈承
旨後以子貴推 恩加崇秩躋亞卿公資稟溫醇而
志慮貞介容儀肅整而步履安詳平生不妄諧笑倉
卒無疾言遽色穆然沉默靜正自持親朋不敢狎婦
孺不敢褻每辨色而作清坐終日簾几從容氣像閒
雅雖身在城市而翛然若處士幽人者名綴簪紳而
泊然若癯儒寒生者孝友之性得於天而篤實之行
成於已奉先竭其誠而一遵文公家禮事諸父極其
敬而於舅氏亦然亂後季父落魄湖堧從母淪寓坡

山公痛念之在家在官必撥冗而往拜之奉觴而壽
合族而歡如是者無虛歲宗子家食棗盛不豐則公
必替行而罔不慎其於伯氏懇眷尤至劈分貲產厚
讓而薄取曰長子任重烝嘗得無缺乎無何伯氏以
送終之具皆出於公堂弟秀岱早孤無依養之於家
視若同氣推而至於疏屬愛博而情遍各得其歡心
其周窮之仁急難之義皆可書而不可盡書半生作
吏田不增畝家人生業日益旁落待祿而飽傭室而
安公處之晏如一點墨不費於乞字秋毫非義則不
受死之日篋無兼衣斂形悉用賓禭清操苦節有如

此者待人接物和氣盎然然方嚴之性至老不刊見
一不善相對不與之言其人媿恥若撻于市小心謹
慎不言朝廷得失黨論是非常有危行言遜之戒然
世道日艱則憂國一念炳然如丹故閒居屏處每發
浩歎訓子弟以義方胤子同知公發軔文途而不樂
榮進迹潛郎署餘十年所當路有連袂人啗以好爵
要與已同同知公怒而絕之蓋其人方握禍福權衆
皆危之公則聞而喜甚識者曰人樂有賢父兄信矣
門戶中替晚景空以子孫科名爲念而如有學未至
而幸占者則公蹙然曰非分之得不祥也命輟慶席

其務實而斥華率皆類此公配完山李氏戊午黨人
評事穆之曾孫兵曹正郎 贈承旨鏗之長女也先
公十八年而逝從 贈視公爵其葬與公同穴凡舉
二男二女男長諱善餘卽同知公也自參議陞嘉善
官至同知敦寧府事兼都摠府副摠管次善慶木川
縣監女長適府使崔珪次適副護軍趙成後公又有
傍室女一人爲楊湜妻同知公初娶礪山宋氏監察
礎女生一男一女男曰元祿童蒙教官女適善山府
使權公諱聖源吾祖也後娶完山李氏佐郎惇女生
二男曰元禎奉直郎曰元祉學生縣監娶某郡李某

女生一男曰元禧漢城判官崔珪生二男曰碩量參
奉曰毅量監察四女縣監李翰衢生員金弼學生安
鎡進士柳重殷趙成後生四男演澆灑浣楊湜二子
萬紀萬齡內外曾玄男女摠一百二十餘人而吾先
子最顯諱格登文科官至司憲府執義知製教嗚呼
今距公歿六十年矣長德俱亾家乘不詳眇余孱孫
其何途之從而獲知先德之萬一哉雖然竊聽於故
家相傳往往有吃吃能言公者至今聞其風有足以
潛消鄙吝激昂頽惰則於是乎亦可以想見其髣髴
矣溫溫氣味愷悌之端人歟抑抑威儀瑟僖之莊士

歟抑其守節清苦又將優於高士傳者非耶孝友爲
政宗門式之仁廉莅官吏民歌之昔太史公序儒林
循吏各著其美而公乃具備於一身此何以稱焉且
吾聞之公自少窮經至白首教授諸生每誦而傳之
諸生皆抑首敬恭聽又聞公與風玉軒趙公守倫定
爲莫逆交昕夕相從對案講論風玉之學實自牛溪
而來其師生執友之間筮告麗澤之旨必有所可觀
者而今皆不傳惜也然其不傳者已矣其幸傳而僅
存者又將日遠而日泯不有以稱述之後生晚出於
何所攷信焉且惟納銘幽堂具著聲烈以詔來世蓋

自近古以來未之有改也夫如是則以公之德之行
如之何其終於湮滅而已也尚夏謹訪於家得古實
若干條參伍舊聞摭次如右用敢委重於立言之君
子庶幾垂聽而擇焉歲戊午仲春外裔花山權尚夏
謹狀

大司憲松齋羅公世纘行狀

松齋先生羅公諱世纘字丕承羅氏貫錦城上祖諱
聰禮三韓壁上三重大匡錦城府院君其後十一世
珪組蟬聯至諱文奎官西海道按廉使賜紫金魚袋
文章行諡冠冕一世是公六代祖也會祖諱繼 贈

司僕寺正祖諱殷制以學行除長城縣監歸裝不滿
三馬世稱三馬大夫 朝廷錄其清白後 贈承政
院左承旨考諱彬成均生員 贈吏曹參判早謝公
車業訓誨後進屢抗疏叫閤名著於世妣 贈貞夫
人海平尹氏某官某之女公以 弘治戊午五月二
十一日生于羅州居平面南山村穎悟出人器量恢
洪家貧好讀書常燃松達曉淹貫經史詞藻蔚然
嘉靖乙酉中司馬戊子闈大科調羅黃兩州訓導甲
午由成均館學諭薦入藝文館為檢閱丙申魁重試
仍陞奉教時金安老當國用事恣兇日甚人皆懾怯

囚舌莫敢誰何公於重試對策痛斥其無君之心至有指鹿之姦等語安老大恚誣以謀陷朝廷下獄拷掠脚破骨碎公拾取碎骨盛之佩囊曰父母遺體不可棄也遂裂衣血書曰上有堯舜之君下無稷契之臣爲國丹忱白日照臨疏奏特 賜寬宥桎棘于固城園中食乏朝夕屢空而公恬不爲意日誦聖賢之書嘗作歌辭北望吟涕 上潛遣中人偵察死生則中人歸報曰手中不釋近思諸書座隅大書忠信二字 上大感悟戊戌安老敗死 上以奉教召公引對便殿宣賜內醞以示悔謝之意是歲又捷擢英

試壯元自是數年之間歷禮兵曹正佐郎弘文館修撰校理應教典翰藝文館應教司憲府持平掌令執義司諫院獻納侍講院文學弼善輔德議政府檢詳舍人成均館司藝司饗司僕宗簿尚衣諸寺院正間與退溪河西二先生及林錦湖亨秀鄭林塘惟吉諸公讀書湖堂蓋極一時之選也甲辰特陞吏曹參議移承政院同副承旨例陞于左轉成均大司成乙巳歷判決事超嘉善階拜大司諫時 中 仁兩聖繼陟 明廟幼冲姦臣尹元衡等鼓煽危言媒孽善類禍機不測公入侍簾前頗有救解之言又疏辨白仁

傑柳希春丁熿等之寃狀姦黨惡之遂遞諫職丙午
陞大司憲又申前言未幾見罷敘爲漢城右尹李芑
等以公會入忠順堂欲錄勲籍公固避不從則芑等
惡其異已擯不容朝丁未拜左尹夏充聖節使如
京還拜忠清道觀察使戊申復入爲右尹時朝議以
仁廟爲未踰年之君不欲入於文昭殿公上疏極
陳其不可坐黜爲全州府尹治民之餘務興文教一
境洽然旣而邪說叟肆國事日非則公憂憤成疾竟
以辛亥六月十四日易簣訃聞 上震悼祭賻如儀
以其年月日葬于居平松林卯坐之原其後百五十

餘年南中人士就所居之鄉建祠俎豆焉夫人箕城
田氏祔葬于右是縣監大生之女也舉三男五女男
長惕縣監次協 贈工曹參議次悅學生女適士人
金景德金千秋府使柳夢井察訪李黃鐘知事柳濂
孫德允德敏士人曾尚文察訪李洪鐘妻長房出也
贈工曹參判德全仲房出也縣監德元德種德符
德基進士德立士人柳守敬郡守金忠秀妻李房出
也柳夢井四子洞潑瀆沔二壻梁宗遇李縉李黃鐘
壻朴之忠柳濂男敬仲慎仲壻縣監李泰男羅德俊
內外曾玄不盡錄公孝性出天年甫十二已知事親

之道躬自漁獵以供甘旨及喪廬墓情文備至睦於宗族信及鄉隣是非之辨甚哲而接人則和氣藹然一瞻顏色者如飲醇耐其文章甚高自成一家而不爲空言皆自經傳中流出其戒從子一篇大槩以陳烈先生靜坐求心之工晦翁夫子應舉讀書之法爲訓而縷縷數百言要不出聖門餘矩觀乎此亦可知其一生用力之實矣是故其立朝事君一以忠信爲主遇事敢言無所回避正直之風益著於鷹鷂之逐剛大之氣不挫於桁楊之酷能保晚節爲世名臣非平日素養之深且大能若是乎唯於鳳城之事不能

無後人之雌黃然是亦春秋責賢者備之義耶蓋嘗聞中宗常語文定王后曰此人可以當國大事惓惓不已是故乙巳之禍文定追念先王遺意不忍以重罪加之云當日君臣之契此亦可見也其爲政清簡仁恕所至輒有去後思其巡撫海西則至摹其像而祀之卒之日完府一境鬢白無不涕泣號慕如弱子之喪慈母儻所謂未施信而民信未施哀而民哀者耶公所著詩文亾失殆盡只有若干首藏于家而其病栢賦一篇膾炙一時人稱有屈宋遺韻歲壬午公之六代孫重綱遠來訪余而言曰吾先

祖行業之盛不宐湮沒於世而狀德之文迄茲未就此實後承之罪也願得子一言以眎來裔嗚呼世代已遠文獻無徵顧余孤陋之識何足以尚論前修以圖不朽哉既屢辭而不獲則竊以一時諸賢之所嘗稱道者揆之知止堂宋公欽以君子人與之河西先生以休休德行推之柳眉菴希春則曰臨危堅似石蘇陽谷世讓則曰觸忌不諱名節煌煌其曰義重命輕承對日名高謗集敢言辰者參贊蔡公世英之句也斯皆可據以爲說而若其世系履歷尚有家乘可稽謹就而隳括序次如右以俟知德者考信焉

按靈光郡善行錄羅德全妻薛氏其夫病穿掌貫索露立禱天既死斷髮不梳蒙白而終其身其子進士逢緒父病斷指飲血事聞朝廷俱旌褒焉公之家法久而不墜也如此并記

通政大夫承政院同副承旨兼 經筵參贊官

黃公胤後行狀

本貫齊安

高祖諱賢孫

曾祖諱世章 贈通禮院左通禮

祖諱大臨 贈承政院左承旨兼 經筵參贊官

妣 贈淑夫人李氏 贈左贊成文虎女掌令謙
之孫

考諱應聖利川府使 贈禮曹參判兼同知義禁
府春秋館事

妣 贈貞夫人長淵盧氏 贈右尹濡之女

公諱胤後字希迪號月渚齊安之黃本出昌原至麗
有曰乙耆以功封齊安伯仍籍焉累傳而有戶曹典
書裨廵生繕工監正惟善惟善生郭山郡事錫齡錫
齡生鎮西衛四領司直處裳處裳生定略將軍美仲
是公之五代祖也公以 萬曆丁亥七月四日生自

幼莊重聰穎慎而寡言不設情容嘗與隣兒遊戲林
亭下羣兒爭赴瓜園公獨安坐不動家僕見而奇之
以器盛進然後始嘗之人知其爲遠器生甫三歲失
所恃贊成公從孫李公元璉無子收而養之撫愛教
育無異已出公亦事之如所生時處士崔德雲以洛
人寓居唐岳聚徒講學李公以公屬之公篤志力行
以懋遠業而不屑意於雕篆之學參判公時居箕城
箕城素繁華人多以聲樂自娛公每以省覲往來其
間而持心堅確漠然若不見聞雖於馬上書冊不離
手故未弱冠而已負士望至 萬曆癸丑捷進士一

等生員三等時年二十七才名動一時甲寅丁參判
公憂廬墓泣血非疾病不脫衰經服闋屢參鄉解乙
丑夏薦拜 順陵參奉其秋擢文科別試第四名纔
釋褐而所養母尹氏歿心喪三年丁卯之亂關西勢
成瓦解公憂憤慷慨處置家屬使避海濱盡括家僮
數十及隣丁應募者若干人馳赴本府府使丁好恕
服其義悶其喪謂公曰君在心制何可同我去就公
不從適聞寇至平山講和而退遂還家草疏斥主和
者爲縣道所阻不果上戊辰制盡始從仕以資窮直
授成均典籍旋移禮曹佐郎己巳除黃海都事庚午

入爲工戶兩曹正郎壬申除茂長縣監不赴以戶曹
郎兼春秋館記注官移拜禮曹尋還戶曹夏出守順
川郡治尚清勤三月政成邑人立石頌之癸酉召拜
侍講院文學自是屢入憲府春坊爲掌令弼善兼春
秋館編修官參修光海實錄間爲內贍寺正通禮院
相禮時公久居春坊多所補益一日 內殿召至簾
外賜以青紗團領 教曰聞爾教予子大有輔導之
功故特以此賞之公卽服而拜 賜朝右榮之乙亥
除甲山府使卽遞爲成均司藝丙子再佐海西幕尋
爲龜城府使兼副元帥從事官是年冬強寇猝至列

鎮高枕公卽領手下兵赴于上將轅門以爲勤王
計元帥不許曰公書生不閑軍旅當還本府堅守城
壘可也公不得已退保鐵瓮城鍊兵巡城日在兵間
時望行在泣下沾襟左右莫不動色亂定招諭散亡
撫摩流民恪勤奉職餘殘祛弊多有梳櫛且不使一
衙眷相隨故其時監司閔聖徽上計有居官三載冷
若山僧等語戊寅特陞義州府尹仍通政旋卽仍任
庚辰除江界府使未赴而再授灣尹兼清北防禦使
府以邊上重鎮素稱殷富而新經兵燹莫可收拾講
和之初酬應尤繁公周旋其間處置中窾惟其先公

後私關節不到故不悅者多未久以病求罷其歸行
橐蕭然邑人或以瑇瑁器進者公卽載錄於重記
辛巳出典順天府其爲政一如龜義時秩滿入爲五
衛將三邑之民皆追思立碑甲申除原州牧使卽遞
乙酉拜工曹參議夏出爲長淵府使八月以鄉試考
官爲勢族之落榜者所構毀公與諸試官皆被遷謫
翌年蒙放戊子除承政院同副承旨以病未及拜
命而終寔四月二十五日也用某月日葬于平壤治
北慈化山花原洞向坤之原配貞夫人李氏宗室錦
平君義壽之女極有閭範平生不以一毫累及公後

公十六年而卒祔于公墓凡舉五男二女男長曰戴堯司馬有至行居父母喪廬墓啜粥次曰戴舜生員次曰戴禹戴極戴一二女適李馨發朴碩亨戴堯三男四女男誨良祐良致良女李逸李有仁李壽一趙智章戴舜四男二女男起良振良俊良傅良女李志淵權處平戴禹一女盧世慶戴極一男四女男喜良女南碩輔沈松晚沈翰伯權尚賢戴一無后李馨發三男三女男斗英斗俊斗雄女李厚根兵使邊是泰朴弘奎朴碩亨四男弘樑弘柱弘榦弘材誨良一男順承以行諡用薦今爲 明陵參奉二女李柱元

世望祐良二男順昌順裕一女姜翼漢致良二女沈湛全爾楷起良無子取傅良子順鼎爲後振良一男順長俊良無后傅良二男長卽出後者次順恆公端雅朗潤望之若神少專意於爲己之學如經傳性理等書無不循環熟復而尤致力於論語一部必求聖賢遺旨以爲實用故其律身中乎禮處事適於理而以忠孝廉儉爲一身之符人以關西夫子稱之才華之美乃其餘事也其居家也必早起盥櫛冠帶必飭門庭之內肅如朝廷好學之誠至老益篤閒居無事靜對書沈潛咀嚼不知其他御家衆有恩而遇親

舊以誠恂恂怡怡恩義周至而於辭受之際唯義是
視至於朝廷得失鄉人短長一不向人評說而尤嚴
於在邑之戒其未第時有一方伯欲試其意嘗密勅
諸妓曰若能奪黃生志者賞之有一妓當行酒乍執
其手公正色不視卽截其汗衫而棄之人服其正其
立朝也不擇燥濕唯職事是盡愛君憂國之誠不以
進退有間或見於詞章或發於夢想屢典雄府而一
畝不增居處服飾略如寒士濟人利物之意出於至
誠故所莅之處民皆愛慕其在順天時嘗夢拜宣
廟宣廟命進而賜醞曰卿居官廉謹處心良善故

特見之公覺而感泣仍記其事以爲子孫觀公之遺
愛最淡於龜城民以麗朝名臣朴屏并稱一閣雙碑
以寓沒世之思歲乙酉石面流汗如泉 筵臣達于
上立朴公廟 宣額而公之名偶不與焉西關士
民莫不慨然公詩詞雅淡嘗以文學接待華使其酬
唱詩什載於皇華集中平生所著述甚多而雅志謙
退不以文翰自居故其所爲文率多散逸不收所存
者只斥和疏及詩律百餘首祭文上樑文箋文十餘
篇塲屋試草而已嗚呼公以退鄉學究起身於草莽
之中能以詞翰學識名世早蒙 聖祖之甄拔出入

侍從身躋紹玉之列歷敷內外為時彥人如公者可謂拔萃之英傑矣以尚夏之寂寥數語顧何能輕重公耶謹撫家乘而略加詮次如右以竢後之立言者
洞虛齋成公聲徽行狀

本貫昌寧縣

高祖諱灑

贈嘉善大夫工曹參判行通訓大夫

工曹佐郎號聽竹師事栗谷先生先海時移居

尚州子孫仍居焉

曾祖諱汝栢以孝廉屢登薦剡

祖諱震昇進士丁丑後杜門不出

考諱虎英倜儻自奇出入九菴先生之門

妣德水李氏通德郎東野之女玉山公瑀之玄孫

君諱獻徵字文式始祖高麗太子中允仁輔自是簪

組蟬聯有曰士達集賢殿大學士謚文孝與崔瑩討

耽羅有功封昌山府院君有曰世平入我朝觀察

使贈左贊成是於君為五代祖也君以崇禎後

甲午二月十六日生於尚州興巖里其夜進士公夢

見大舜異之以孝舜為小字及長以進士公命為伯

父諱虎祥後以豐壤趙氏為妣趙氏處士興遠之女

蒼石李公峻之外孫也君神氣穎秀人以仙骨稱之

數歲便知讀書過目成誦五六歲能解聯句八九歲吐辭驚人十二歲作水石亭記膾炙人口載輿地新編其他吟詠人皆傳誦十四歲丁所生妣李氏憂執喪盡禮十五六泛濫諸家無書不見若老佛之學陰陽之數無不搜抉嘗推演八陣圖撰奇門遁甲法多以己意作圖補之屢試屢驗從學諸弟請學其術則君曰造化之妙不可漏泄也尋悔之曰聖賢事業自可樂何必役志於吾道之外耶遂焚其書專心聖學嘗曰學者於窮理居敬力行三者廢其一非學也人日賦詩自警曰我參三才一俱存禮智仁紛紜隨世

利迷醉失天真掩目思前事驚心發媿鬢舜余知在學友勉日唯新父兄奇愛之十五以前嫌其聲名之太早禁赴舉以後篤志于向裏之學不事公車業遂構書齋于家後扁以洞虛嘗靜坐講道不言世間是非或有言色目論議笑而不應題詩示之曰一嘻復一笑世事還無常不如都相忘花前把玉觴又有盛言功利者亦不應作詩示學徒曰紛紛舉世爭昏惑此理由來識者稀役利何須心自苦樂天猶可道相依鵬搏碧海因風去鳳叫丹山覽德飛萬事從知有時命信非人力所能違有客積功於暮三百者曰花

潭精思十五日方解釋君盍致思焉君卽思之半日
盡通曰花潭天分極高十五日之說必不然也仍與
客討論客歎服不已後以疑處數節因尤菴門下人
質于先生先生曰此大賢之資至有願一見之教而
君多病未果就拜適逢宋公基厚講討數日宋公大
驚曰見識高明言論正大誠三代上人物時君年十
八或勸次栗谷天道策泚筆立草不拘科臼極論天
地造化之妙多發前賢所未發見者皆以爲達理之
文受學門人中第三弟晚徵達卿三從弟遠徵厚伯
最被教育或從傍問聖學極處則曰學問躡等終必

無成當循序以進勿生妄意又曰四勿是聖學緊要
處而視聽言不出於動中尤宜詳察於動時此非高
遠事只是日用事物省察克治之道也孔門唯顏子
得聞故後人疑其難行然不學聖人更學何事必以
聖人爲標準然後可以成就耳又曰太虛之體真有
不可無曰理理之自然變化曰氣氣中之理曰性性
之靈謂之心心之感而動謂之情情有善有惡而聖
愚分焉非聖自聖愚自愚此心操舍之幾聖亦愚愚
亦聖可不戒哉可不懼哉每於燕閒中諷誦光風霽
月庭草交翠之句謂諸弟曰灑落氣像一般意味體

認於曾中則庶幾廓然而見大公之域矣壬子祖妣
金氏歿君服承重喪常侍几筵經帶不暫脫遠在心
制鷄鳴而起盥櫛省謁于王父退則奠拜于奉主所
制盡亦未嘗一日廢乙卯尤菴先生將遠竄有人致
書曰默觀世事生者亦宜守拙巖穴而已君答曰如
我輩不識不知鑿井耕田歌 聖德足矣又何怨尤
況時有否泰道有消長此乃理之常也君子安於理
而已傷歎奈何喜樂奈何君氣稟清弱自少多病丙
辰春往三山甥館邁疫幾危四月還家仍成奇疾移
寓于洛西村疾病厚伯請禱山川君曰汝曾不讀論

語乎某之禱久矣何用禱爲翌日開窗視之曰今日
天朗氣清真良辰也仍告于所生嚴親曰今日子將
不起請使人報于王父前且通一家使我及時告訣
麾出家人曰男子不絕於婦人之手禮也遂跪坐吟
一絕仍朗誦乾卦不錯一字傍人問其故答曰此乃
平生所好而且試精神誦訖聲與命俱絕是丙辰十
一月十四日也得年僅二十三時達鄉割指進血君
曰我欲全歸汝何忍此是夕大石如屋者隕自露嶽
聲震遠邇計聞士流之識與不識無不痛惜尤菴先
生以書慰所生親曰長胤之喪實關運氣豈獨一家

之私而已明年五月十七日葬于州西霞谷村後壬
坐之原配商山朴氏縣監纘先之女無子取從兄久
徵之子沈爲嗣沈有五男三女男長必柱女適金琬
宋載極下至泰君溫良愷悌瑩然無一點塵累動靜
語默自然中道望之知其爲君子人也初年或知遠
外事歷歷如眼前所見人驚問之則曰心之虛靈如
明鏡物來而照奚是異事聖人至誠之道盖有前知
之理康節臨命能知外事亦可驗也其省已也以閑
邪存誠精一執中爲服行之符其讀書也以默識心
融精思實得爲務尤致意於義經嘗曰伊川不窮數

學故傳說多有未盡處每以本義爲主仰觀俯察瞭
然有見於天地之實理其教人也雖幼賤必開心見
誠反復誘掖使之自得於心居家則上奉下御俱盡
其誠雖僮僕之桀黠者皆革心改行接人則露盡心
肝無有表襮人皆敬服不敢簡慢若其閨門之內相
敬如賓終始如一此其實行然也君常整衣冠合眼
靜坐不知所思何意其中必有所樂自不能已者而
未嘗輕以語人亦不欲著書立言抑傳所謂惡其文
之著者耶嗚呼玉樹丹翎要非人世間物君之資稟
庶幾似之天之所以生君者夫豈偶然而然哉妙齡

正路已近高明天假之年其進不可量而不幸短命未遂厥志之萬一使間世之才不得爲聖王之瑞此何理也君之所存世無知者而獨厚伯與達卿謹守師教傳其心法耳余與二君有莫逆之契稔聞君事實日月多矣恨未及一雅於平日以滌鄙吝今達卿之子爾鴻以其家乘所載者來示請述行狀遂略加隳枯而爲文以備惇史之採錄

澹巖處士鄭君龜河行狀

本貫迎日縣

高祖諱宗溟通政大夫江陵府使

會祖諱漫成均生員 贈吏曹參議

祖諱慶煥司憲府監察 贈吏曹參判

考諱泌尚衣院別提

妣昌原黃氏

君諱龜河字聖則遠祖均之高麗平章事世襲簪纓至我 宣廟朝有諱澈左議政文清公世稱松江大爺是江陵公之考也君以 崇禎後甲辰九月十四日生器宇超凡參判公甚愛之自四五歲已知事親之道十五遭王母閔氏喪殯窆諸具頗自檢幹諸父兄恃以爲重事小大悉委之叔父丈巖公廬墓守制

君以童穉往侍受大學論語等書淹通大義自是專
心向學尤菴先生見而奇之既長從潔淨柳承旨譚
厚學飭躬循禮柳公每稱有法家風已巳禍作益無
當世意遂廢舉子業同遊之士如成師傅晚徵韓斯
文元震亟稱其實行與之交契莫逆一日成君過宿
君澹巖村居謂文巖公曰吾竊矚其居家處鄉之方
皆有條理隣里薰德稍有向善之化殆非今世之所
易見癸未丁外艱衰麻不脫於身菜羹罕入其口毀
甚幾殆幸而獲全人皆稱孝焉君嘗築數間茅廬揭
大規模巖心法六字於壁上以自觀省雜植松菊梅

竹於庭讀書之暇嘯詠其間雖蔬糲不繼而晏如也
君雅好丹陽山水每至輒怡然忘返晚欲卜居於奧
區以爲避世之計不幸邁疾以癸巳八月三日終于
樓巖舊居臨歿精神了然少無怛化意告訣于慈堂
曰人生五十非歿請勿過傷又顧謂諸子弟曰余於
今日少無憾憾之意但老親在堂未得終養此余所
以死不瞑目也遂屏絕婦人恬然而逝計聞遠近相
識咸嗟惜曰善人歿矣以十月二十八日葬于忠州
迦葉山負辛之原君娶文化柳氏其父生員畦潔淨
之從子也生四男長隲後君四日歿次柔槃槃隲一

男一女柔二男一女并幼君性坦直對人不設畦畛而處事縝密未嘗有罅隙聞人之善寤寐思見見人之惡若將浼然竭誠奉老子職無愆旣孤日必晨謁于祠堂如見先公所嗜之物則輒泫然出涕終身不近口行諒播聞州牧薦剡朝廷亦有引重者而君不屑也若將終老於林下焉嘗戒其子弟曰余觀世人重科名徒以聲律爲事此則不願汝曹效之也唯篤學力行無忝家風可也嗚呼以君之資之美自幼績學又能孺深於法家天假其年其所成就何可量也不幸早世未霑一命豈非數也雖然孔子曰唯孝友

于兄弟施於有政是亦爲政奚其爲爲政庸何歉乎哉余病淡蟄君獨逐海上之臭與之交密真如退之張徹之讓抗慙丁也君遽捨我而先逝踴踊人間懷緒悲辛今柔持文巖所撰表記來謁行狀遂以平日所嘗聞見者略敘爲文以備立言者之採擇云

進士禹公聖瑞行狀

公姓禹諱聖瑞字玄徵系出丹陽遠祖諱玄麗代鄉貢進士後十世有諱玄寶侍中贈諡文靖公侍中生諱洪壽八我朝刑曹判書兼兩館大提學判書生諱承範吏曹參判參判生諱繼孫林川郡事始居于

公州儒城四世而至諱綱俱中生進寔公之曾祖也
祖諱弘量考諱灑宣務郎尚衣院主簿妣順興安氏
悌吉之女常讀小學三綱行實以自律有女士之稱
焉以 崇禎壬申九月十三日亥時生公于儒城南
谷之里第生而明粹天賦特豐其在髫髻不待教訓
而自知愛敬父母之道六歲隨羣童入果園所拾之
果未嘗隨衆共啖必懷歸以進父母父母曰汝何不
食而懷歸耶對曰念父母不敢入口又於一日家間
作田螺羹以進公獨卻而不食曰吾聞是物殺母而
生故不忍近口聞者異之曰天生孝子八歲入學拈

出童蒙先習中人不知五常則違禽獸不遠之句特
揭之壁又書其下曰爲人子者讀此句可不懼哉其
字畫不習而亦端楷有法嘗因下堂而傷其足惕然
驚懼不能自安執笞請罪於父母曰身體髮膚受之
父母不敢毀傷孝之始也子今不謹空受不孝之罪
盖已學孝經故有此言然其不泛讀而體之於身可
知此豈八歲兒所能言者哉非但父母奇之而族黨
皆稱爲孝兒讀小學孝經既授以他書則公曰爲人
之道盡載於此何必他求請加熟復又以六德六行
及餘力學問等語書座右警省凡所讀書擇其要語

必思體之於身而至於古人之嘉言善行尤銘心佩服見者莫不嘖嘖稱歎以爲十歲前德行已備矣十一歲母夫人產病危欲將屬纊公叩曾叫天乞以身代移時得蘇漸臻差復至誠之感天孔神矣稍長益勵志爲學博觀羣書若大學之不出家而成教於國論語之奚其爲政是亦爲政之訓必朝夕諷誦如有會心之樂其所玩繹而心悅者皆務本之語也未冠以親命兼習舉業詞氣夙達警絕清新十六歲中鄉解一等辛丑與伯氏俱登司馬時雙親無恙一時榮之遠近致賀者皆以孝友感天之語吟詠而嗟歎焉

嘗赴試親意慮其清弱命率寫手公曰罪犯欺君子觀光所以立身事君欺君之習子何敢爲又臨科親有微恙而勸赴之公曰父有疾而子趨榮是遺親而先利耳竟不行早師尤春兩先生門下同門士友無不推重嘗與五六月講易至泰卦君子道長小人道消之句尤菴先生曰學易者須先審於君子小人之別進退消長之幾然後於易可庶幾焉其各述所見以進諸公辨論知幾識微之難易各有著說公之言曰君子而有不仁者小人而有恭儉者知君子小人固難也可以進而不進者無匪躬之節可以退而

不退者無高尚之志知消長進退亦皆難也俱以所
論稟于先生先生曰諸公之論皆不爲無見而若禹
君所論是能體認經義深究旨要者矣後以親年漸
高不得遠遊師門定省之暇取經傳及周程張朱之
書反覆參究其有疑義就質不已焉余於師門嘗與
公同處一舍一日夜忽然驚起有治任將歸之意余
怪而問之公曰夢兆不吉或慮親候未寧方欲徒步
而歸俄而家僮以馬至果報以親濟卽入拜辭師席
先生曰近日講論之樂曾所未有何其遽歸未及奉
對余具告厥由先生歎曰若人精誠貫金石孝友通

神明者也自是常在親側未嘗少離奉養諸節躬視
朝夕衣之煖寒饋之溫清極其優適凡有甘旨不計
其直故鬻雉魚者爭至得售焉事必稟命不敢自專
唯務溫承少無違拂或值幾諫必愉婉其色芬芳其
意期於悅而後已丙午春主簿公疾革公嘗糞而驗
其症割指而進其血延其奄奄之喘而得至數朔矣
及至大故斂襲諸具躬自看檢必臻其極少無餘憾
廬墓三年啜粥終喪終喪之後雖有病必逐日上墓
不廢哭泣不惰不懈終始無間仍以露形成疾竟至
難醫聞者莫不惻然其祭祀也則必沐浴蠲潔極其

誠敬不以祁寒溽暑或廢凡百祭需未嘗委諸婢僕
親自看飭端坐達宵哀慕如新著存致愆之意少無
所忽常言喪與其易也寧憾祭與其備也寧誠蓋主
禮之本意而至於日用節文亦必稽于古而不肯苟
循於俗其事伯氏則致養侍疾一如事親晝以聯牀
夜以共衾未嘗相離妹家俱貧必通其有無共其飢
寒撫育諸甥無間已出或攜子母與歸務盡湛樂一
堂之間和氣藹然其教子姪則必先小學諄諄警飭
又以遺書戒之曰人有百行孝悌爲本罪列三千不
孝爲大嗟我來裔克勉克敬無忝所生至於宗族鄉

黨誠信以待之溫柔以接之救災恤患曲盡恩義人
無親疎各得歡心或至義利之辨凜然斬截不少放
過見人過失提誘開譬款盡誠懇亦多感悟而自化
或爲不善者輒自瞿然曰無或某人知之耶素性恬
靜勢利芬華泊如無意視世之奔趨榮道若將浼焉
嘗與伯氏冬夜共卧有一官人冒風雪行呼唱凌晨
而過公曰布被土牀無事足矣彼人良自苦淡惡惑
世誣民之徒僧尼巫覡不使接迹於門常曰死生禍
福聽天所命何可動心及疾病語伯氏曰有生必死
死何爲憾只以母氏悼傷伯氏熒子爲念而一語不

及於家事辭氣不亂從容就逝卽已酉四月五日乃終喪翌年也及其葬也士友咸集俱以哀辭誄其行誼且居泮宮纔經一朔而聲譽甚盛爲儕輩所推重初期之前無不誄文而來弔至行之感人此亦可見矣初葬儒城長生洞後移葬于王巨巖辛坐之原配密陽朴氏參奉承後之女生於壬申十二月十六日卒于辛酉八月二日有婦德事君子無違祔葬于墓左育一男夏圭夏圭二男四女男長彰績次時績三女壻黃櫓李夏炳李龍東季未行彰績一女時績一女并幼黃櫓二男長仁燮次仁炯夏炳一女龍東一

男并幼盖公以清明之資加問學之工培養已固早自得師聞見日博至於孝友出於天性自孩提至臨終至誠如一眞所謂不失赤子之心者也爲仁之本旣立而制行之方愈修士友敬服頑悍嚴叟內積忠信外自孚感也如是矣獨惜乎天奪其壽竟不得有爲斯世存順沒寧在公何憾而後人遺恨盖無窮矣公之孫彰績已後逮事家乘亦無傳大懼至行之泯沒遍謁諸長老訪逮各以所覩聞錄示仍編家狀俾余撰次噫余與公同遊師門并登上庠所期不汎故茲撫家譜所載及平日所見聞者而尤菴先生孝友

通神明之教同春先生相期不在少之句尤可不朽於百世矣姑以一語謹識其稷槩如此

縣監崔君弘甸行錄

有俗衣冠而古心貌泥塗行而神仙風者崔壽會其人也余少也遇於泮宮心甚奇之相與親厚白首如一今其墓木已拱矣每憶高風悲不自勝其胤子華岳泣請行錄余何忍辭謹按公諱弘甸壽會字也高麗侍中耽津君思全之後也祖諱夢得父諱南振母某氏以崇禎丙子十二月廿二日生於寶城朝陽上坪里生之日祖母金氏夢一絳衣人騰空而來百

拜而賀曰生此忠孝兒必貴且壽晬日雜設戲具皆不顧獨執經操筆爲讀書寫字狀傍觀驚異之三四歲能讀古詩六七歲盡通史略十四五就學于同郡朴上舍春章上舍大器之教以經書頗得心學之工復遊同福丁上舍好敏之門慣誦莊馬詞賦之屬遂以文鳴于京鄉旁通天文地理愛看周易參同契而於天文易象尤精晚好心經近思錄朝夕置案以爲歸宿之地四十四登明經科歷職郎署及己巳禍作慨然流涕曰豈可以斗祿累身哉棄官而歸杜門先墓下甲戌夏化爲成歡察訪遷陰竹縣監見忤當路

未赴而遽旋復文兼壬午六月廿九日客歿于京邸
李相國會與知舊諸人營辦棺斂諸具無遺憾又作
挽誄以哀之葬于興陽治西中山之坎坐原享年六
十七有二男長台岳次卽請文者不遠千里從余於
東峽學業甚勤長房三男二女次房四男嗚呼公以
慈良恬靜之資有嗜學好善之實浮沉末路矜然不
滓而節食煉氣儵然而化其視世之齷齪奔趨醉生
夢死者何如也又其天性孝友連喪二人廬于墓側
哀毀盡情讀書見父母字不覺潛然涕下其遭同氣
之喪年已衰老露處山下殫誠營窆襟袖上常有泣

淚之痕其訓誨子弟則必以義方嘗曰孔夫子當六
國僭王之時作春秋以明大一統之義朱夫子當北
虜驚逆之日述綱目以明攘夷尊華之義今日是何
等時耶尤菴老先生堂堂之志如秋霜烈日而彼欲
詆斥之者抑獨何心今之士大夫必以此存心可矣
噫今世此言不可復得聞矣唯公事行之可書者豈
止於此而老病昏瞶撮其大略如此後之觀者亦可
以髣髴其人耶

亾子府使煜行錄

亾子名煜以崇禎戊戌八月七日生自幼聰穎異

凡兒讀書未數遍輒成誦才藝邁倫同隊推服辛酉
選進士甲戌參別試解額不偶見時事日乖無當世
念自乙亥廢公車業丙子冬除英陵參奉數月以
病遞戊寅拜翊衛司洗馬由侍直副率庚辰遷司僕
主簿辛巳移工曹佐郎癸未爲鎮川縣監不赴甲申
以左水運判官轉報恩縣監瓜遞道臣上治績有陞
敘命邑民追思三處樹碑辛卯丁內艱癸巳冬拜
尚衣別提甲午歷敦寧判官陞丹陽郡守丙申余爲
時人所困滯渠不安於在官七辭得遞十月除善山
都護府使以病免丁酉三月感寒疾時余承召詣

溫陽行宮急送書要一訣畱疏疾返是廿八日午
後也疾已難醫而精神尚了了問筮對說話頗詳
仍託付後事半日媿媿以其夜半屬纊悠然無怛化
色聞是日朝作草堂銘四句前一日使人梳頭剪爪
貽書于內舅鹿川公不錯一字見者嘖嘖咸服其定
力以六月八日葬于忠州開天洞東谷丁向之原遷
淑人慶州金氏墓合祔遺意也渠爲人精明端雅正
直公平不甚刻苦于經學見解透悟無學問之名而
有學問之實者正其人也童丕謁同春先生先生大
加獎詡常曰洛下諸兒中第一也弱冠出入華陽門

下大老許以遠到以幼晦字之由是感激知遇至誠
尊親井邑治喪多所致力其後修校朱子大全劄疑
也竭其心目之勞至於文集之役把作已任搜訪遠
近釐整註誤遂成百有餘卷寫作數帙規模井井大
體無欠人以此役之成歸於我而其實無非渠積年
孜孜之功也愛親有至誠事我五十年未嘗使我皺
眉余有過失隨事力諫真可謂父子間知己也中年
以後替管家事雖甚貧窶而黽勉有無能濟百口之
飢俾我忘憂亦幹蠱之子也母氏宿抱塊病至辛酉
感寒添劇八年在危境渠晝夜扶護解帶之日絕稀

遍究醫方躬執藥餌竟得神效後辛未邁癘時亦然
洎辛卯巨創自殞斂葬祭大小悉躬莅而罔不慎舊
患痰火乘時復欲輾轉沉痾幾危幸全居家恩義篤
至推而至於親戚俱得歡心待人以誠信鄉黨愛戴
在官政尚撫字雨露常勝於雪霜至於清白一節可
質神明與其季父判書一時并稱冰蘖志尚淡泊名
利芬華若將浼焉朝夕食不重肉蔬菜數器而已及
其官食亦然歷典數邑田不增一畝屋不增一架平
生無長物几案筆硯亦薄素而晏然餘可知也詩文
有氣力所述作明暢簡當其筆勢亦道緊雅麗人爭

傳玩而未嘗以此自多於醫技地術無甚著工而往
往有妙按者於天文筭數亦頗涉獵雅愛仙巖水石
欲結茅終老而力不能辦居常耿耿也我權氏貫安
東高麗太師幸之後世出大官爲東方甲乙族入我
朝寶文提學克和左參贊城最顯高祖諱霍察訪
贈吏曹參議會祖諱聖源府使 贈吏曹參判兩
世有大名於士林祖諱格執義 贈吏曹判書以清
名直節爲世名臣二代墓碣皆尤菴宋文正公文也
母李氏系出璿源其考郡守 贈領議政重輝也金
淑人副提學慶餘之孫縣監震粹之女幼以淑哲稱

人以爲女士十九歸於渠同春堂所命也生二男養
性業文定性參奉二女適李思徽黃梓庶子順性五
性一女幼養性四女定性一男五女女長李東馥次
吳瑗餘與順性一子俱幼嗚呼渠自少聲望蔚然一
第是分內事而早停舉業低徊蔭仕此正從吾好之
意不足嗟恨然稟氣精剛宜享遐壽而緣余負乘以
致天道忌盈使渠無辜而奄忽此余之至痛雖欲百
身而贖何可得也哀哉哀哉渠臨訣謂余曰大人撰
人家文字或不免過實來頭敘述狀文只以數行記
實願勿張大言猶在耳何忍忘之聊綴槩略以備惇

史之採錄云

寒水齋先生文集卷之三十四 終

